



耳溪集 十三

墓碣銘

共二十三

~ 16
2330
13



2330
21-13

耳溪集卷二十八目

墓碣銘

兵曹叅判權公墓碣銘

禮曹叅判金公墓碣銘

吏曹叅判尹公墓碣銘

左承旨成公墓碣銘

左承旨旅菴申公墓碣銘

右副承旨止齋李公墓碣銘

大司諫西州曹公墓碣銘

兵曹叅議任公墓碣銘



Blank writing area with vertical lines.



耳溪集卷二十八

墓碣銘

兵曹叅判權公墓碣銘 并序

曩余尹龍灣入府見官舍瓌壯甲於諸路問誰所建
對曰權公某也仍問其政績之大者曰焚債券以立
柵市築楊堰以當邑租余矍然異之及解歸灣人謂
柵市楊堰邑之大惠請紀方伯李相國與公之功徵
辭於余立大石郭門之外其後余仗藩節巡邊又再
奉使如燕路過碑前輒下車摩挲而過今公嗣子燾
齋公事行來乞麗牲之刻余不敢辭公諱一衡字信

卿其先本新羅宗姓太師幸之後佐麗祖有大功謂其炳幾達權賜姓權食采於安東終麗之世名德烜赫入我朝有栗亭先生節以集賢校理遭 莊陵遜位托疾不仕五世而有諱鏤光海時在槐院罰賊臣李偉卿久斥于外 仁廟改紀徵爲承旨丁丑下城後退終于鄉於公爲高祖也會祖諱堦歷敷清華六按藩闈官至禮曹叅判祖諱斗相僉知中樞府事贈吏曹叅議考諱益文義禁府都事贈吏曹叅判妣贈貞夫人豐壤趙氏右議政孝憲公相愚女公生於肅宗庚辰幼而器度不凡孝憲公奇愛之及長受業

於金諮議載海 景宗癸卯中文科 英宗乙巳選入槐院丁未除金泉察訪戊申嶺賊稱亂時升平久變起倉卒吏民多驚散公招父老揮涕諭逾順之義爲文翻以方言遍曉之人心始定賊投關於諸驛索駟騎公縛持關者搜其身懷白刃卽命斬之賊喝曰大軍朝暮且至吏卒懼不敢犯公拔佩刀欲手刃之一有一吏乃前斬之遂盡收馬入保金山郡巡撫吳公命恒舉以爲從事賊平還奏曰自安陰陷列郡惟怯而獨權某處變不撓賊不敢近境 上曰予已知其爲人特命陞六品朝議宜先通顯職遂以侍講院說

書召尋遷兵曹佐郎除司諫院正言疏陳嶺南事請設鎮於金山秋風嶺以鞏關阨又論慶尚兵使李時蕃尙州營將韓涑擁兵逗留狀請施軍律冬以書狀官赴燕嚴束譯胥一行肅然辛亥春歸移司憲府持平秋北路大飢朝廷擇北評事董賑政遂遣公殫誠賙活庚戌還拜持平爲養得金城縣令勵精爲治民樹鐵碑以頌之甲寅拜兵曹郎乙卯爲全羅左道京試官還拜正言丁趙夫人憂號擗踰禮旣闋掌試平安南道還拜文學移持平弼善戊午平壤營邑新定分供之規朝廷擇遣公爲庶尹節用蓄財定爲恒式

又修社倉一遵朱子舊法民皆便之朞年而入拜獻納間爲軍資監掌樂院正再除弼善壬戌春擢爲江界府使公擊牛餉士日勸騎射甫一年武藝冠一路又謂邊俗椎鹵宜使知親上死長之義課文考講賞罰有程士皆興起焉按道者有世嫌貶罷之甲子拜同副承旨至左副自是乍遞連拜乙丑薦授義州府尹州居兩國之交冠蓋旁午經費浩穰常出錢於民取息以資用錢益多而逋益積民不能償流亡之不已至於隣族時李相國宗城爲方伯巡到府與公議悉焚其券遂馳聞于朝以皮革入柵交貨名曰柵市

征其稅以當錢息官民至今賴之有廢堰在楊下江邊公捐重貨築堤種稻歲收數千石以代一邑之租別立庫以貯民稱權公堤又鳩白金三萬以備不虞始府舍朴陋不足以示遠人公有意經度而近州無良材是夏大雨忽有巨木萬餘蔽江而下欲起一樓須大石礎而不可得有耕者得之土中尺度適用人皆異之柵外多曠土藩人利其腴囑閤部將退柵於鴨江邊蟒牛哨等地藩陽將來審界領軍出住朝廷患之委灣尹沮之公乃盛戎服張兵威隔水對語極陳兩界之弊請具奏皇京藩將始不許爭之累日反

覆開曉乃肯從柵遂不退 上聞之深獎其能丁卯冬人有以擅開柵市咎公譴配黃州戊辰宥還連拜承旨壬申轉左承旨五月 三殿尊崇禮成以勞加階陞都承旨遞拜同知義禁府事十月出爲春川府使癸酉內移乙亥拜刑曹叅判丁丑淮陽荐饑民多流散府使以不職罷者三人 上特除公面諭安集自闕下領流民以去至府十倉皆空祇有橡實三十石官無廩儲米豆鹽醬悉資於家樵採用衙童一不煩民招諸負逋者告諭以誠不刑一人而輸納數千石仍奏請移粟殫心賙濟是年秋大熟官有栢田又

耳溪集 卷二十八
多實以易錢防民役凡百官需一切蠲減闔境晏然
嘗獲二賊詰之乃迫於飢從賊者公赦不治充官隸
限一年給料使之農遂爲良民已卯還拜左尹秋喬
桐大飢命擇文臣往撫之特授公爲水使召見握手
諭曰卿復活我島民予豈長使卿作此行耶公受命
感激卽日馳赴移粟賑民一如淮陽仍葺廨宇繕軍
器御史見之歸而褒奏民起去思臺於海上庚辰遞
還監武試於訓練院得風痺輿疾歸除兵曹叅判未
謝命遂以十一月十九日終公豐貌大耳局量沉厚
外樸而內敏人莫窺其淺深早年釋褐蔚有時譽而

見朝論多歧黨禍將起不欲投跡名塗壁掛宦海圖
以寓戒杜門息交口不言時事以自疎於世及當丁
未近戚舊交多列樞要又不肯俯仰追隨自壞素志
以是終始寡合名位遂不顯可見操守之明且確矣
特以一郵官受知 聖主常置喉舌凡有盤錯之地
輒屬於公靡不迎刃而解 上嘗論灣尹善治曰何
如權某遣淮陽守則諭曰當效權某每稱純實哉若
人外績旣茂行將大用而公遽歿矣識者爲之嘆惜
公自中歲已有退休之志占一丘於東郭外有水石
之勝鑿池栽樹建亭於溪上李尙書喆輔引靈澈詩

題其扁曰見一趙相國顯命爲之序常以箚笠櫻杖
逍遙自適有職則騎驟赴闕解官卽還惟其感激恩
遇不憚燥濕當官盡力以爲圖報之計而不以榮利
嬰其懷焉配林川趙氏贈叅判明復女也高潔貞一
有女士風生先公一年歿後公五年始葬公於原州
于川里良坐及夫人之喪再遷而合祔於中崗舉一
男曰緯繼伯氏後一女適江陵金漢鎮公旣無嗣以
從弟萬衡子燾爲後進士今佐郎庶子曰燾曰默主
簿曰薰武科判官曰熙曰烈緯娶郡守林蘧女有男
榮女婿朴相簡燾娶朴長淳女有男馥進士後十四

年癸巳燾中發解 上召見之愴然曰予思乃父命
政曹官之噫公之歿已久而 聖主之眷猶不衰斯
可見忠蓋之素孚矣遂爲之銘曰
臨難而斲賊使敵愾之勇也守邊而抗蹙封衛國之
正也牧民而活兩邑遺澤之廣也 上則需才臣惟
急病時方競驚我獨斂讓樊川之上岸中植杖經濟
林泉嘯傲偃仰居則是釣魚老叟出則爲騎驢宰相
公去不復我銘其葬

禮曹叅判金公墓碣銘

并序

公諱尙迪字士順江陵之金出自溟州郡王周元別

貫爲肇祖後孫蕃昌世多聞人暨我朝工曹判書鍾
逸持平揚南兩世最顯六世而至諱善餘以禮曹判
書諱添慶之子歷翰苑湖堂無年官不長無嗣取宗
弟叅議諱夢虎之子得元子之以蔭進官止奉事後
贈領議政寔公會祖也祖諱弘柱濟用監奉事贈領
議政考諱始炯行兵曹判書妣贈貞敬夫人全義李
氏佐郎光肇之女舉公於 肅廟戊子幼而氣宇儁
邁不肯受羈束讀書爲文不刻意而詞理夙就有聲
庠序己酉丁內艱旣闋擢 英廟癸丑謁聖科隸槐
院乙卯被選史局時有修隙者以院帖誣筆舉先故

沮之伯父孝憲公上章辨之下 批昭釋百年遺冤
至是快伸以公顯揚之力也大臣以翰苑舊例筵白
陞六品歷兵曹正佐郎移拜正言持平選知製教丁
巳正月又拜正言時有雷異 上特召大臣諸臣責
躬而求助公進曰臣於日前陪扈仰瞻 天顏有非
昔之歎人或言內寵漸廣女謁太盛人主一身係宗
社安危寧忽在色之戒乎請於前席明承 下教欲
知外言虛實焉 上歛容曰諫臣初登筵有此質問
誠有古人風予甚嘉之但齊宣答孟子有好色之言
予所自期不欲爲齊宣而近適有就館之事無恠乎

有此說也又言立紀綱在於罪貴近用人才在於清
仕路慷慨敷陳語多指斥筵臣皆聳聽趙豐原顯命
曰臣亦入面駁中而今日始見直諫官矣 上爲之
動容稱善翌日公又詣臺 上特召之諭曰昨者規
勉出於忠愛故欲更見其風采也 聖主虛受之量
人臣鯁直之風兩得而益章一世榮之是夏出宰稷
山縣稷孔道殘邑也湖南土貢之過境者輒責馬於
民公別設廳以除其弊屬當歲饑捐廩調活闔境無
瘠御史褒奏之戊午以持平召還秋湖南伯以病亟
聞大臣請以公差都事往管一路公以拘公格辭遞

移拜侍講院司書文學冬復拜持平請毀郭外尼舍
庚申被瀛選拜修撰秋 上幸 厚陵輦過故都登
滿月臺公從焉以殷鑑不遠引古進戒冬以御史按
試南漢辛酉春關東大饑 上特差公御史監賑及
夏竣還 上諭筵臣曰人不在踐歷金某年甚少僅
經一小縣而善了關東之大賑矣伊川有古味灘僻
處西北之交素稱逋盜藪朝廷常憂之公單車往赴
察其形便蠲其疾苦歸奏甚詳 上以不憚險阻盡
心國事尤嘉獎之歷吏曹正佐郎兼文學秋承命試
士于關西壬戌春 上行視學禮選講書官公與焉

連拜獻納掌令弼善執義司諫兼輔德南學漢學教授司僕寺正冬 上親臨慮囚公時在經幄特命參論公進戒曰昔我 孝廟當三覆教曰暖氣如春沉霧四塞予心悚慄特減二死囚目今冬霧又如此願 聖上體 聖祖欽恤之德克慎於斷囚之際焉 上嘉納之癸亥春清皇巡到瀋陽擇遣問安使趙豐原爲上价而公爲書狀俱特簡也冬復命時有臺臣陳一䟽事關私廟 上震怒屢下人臣不忍聞之教大臣以下求對不能得公在玉堂與臺臣伏閣仍排闥直入 上叱令退公輒對曰不得請則無退席藁到

天明 上感其誠始賜對公流涕陳曰因一臺臣事使 祖宗付畀之神器若戲褻然書諸史策謂 殿下何如主言甚激切 上以直入寢殿咫尺之地嚴教下之理禁堂與三司相繼疏救 上曰某也爲君之誠予非不知而罪之者慮後弊也仍特宥之拜應教兼校書校理公自遭嚴旨惶蹙不就職 上臨法講教曰某若不叅講席向日排闥之意安在宜令聞之公感激膺命仍陳戒曰自古帝王始雖勵精晚年漸不如初故唐之魏徵有但如貞觀初之語衛武以九十之齡猶作抑戒之詩乃曰靡不有初鮮克有終

耳溪集 卷二十八
誠格言也惟 殿下念哉 上曰言出於誠無異十
漸疏也 上取小學書依思政殿訓義故事使詞臣
纂輯攷校命公主其事甫數月奏訖一日 上臨講
筵從容語公曰設不幸國有緩急當守都城不去予
欲書以遺後昆公對曰揆諸經道則 宗廟社稷之
所在孰肯爲去邠之舉而苟當危迫之際如壬丙則
勢有不可料者今若形諸文字以詔後反恐難處於
他日事有常變不必預講矣 上深然之甲子夏
上親臨殿庭頒賞五營兵夜深宮門不閉公與館僚
求對前奏曰闕門半夜洞開軍兵填咽禁庭恐非謹

嚴之體 上怒曰予方慰悅士卒儒臣此言將使君
心疑阻三軍耶命罷職其後諭筵臣曰金某言知出
赤心而其時處分所以慰秣韋也仍命特敘還拜應
教旋擢同副承旨由兵曹叅知移大司諫乙丑正月
連有虹貫之變朝廷大警懼中外理冤獄遣審理使
于八路初命公畿內特移嶺南公閱實明嚴無不詳
允復命日拜承旨 上嘗齋居製常訓以誠 元良
又製自省編以自警輒命公與諸儒臣編修在禁中
應製居第一賜臯比間拜戶曹叅議先時燕使以失
銀事舌官呈文於盛京禮部後三年己巳彼國移咨

耳溪集 卷二十八
請會查蓋近年彼有退柵之議而我不從故將以是困我也朝廷慮生釁以公差叅覈使帶刑曹叅議而去廟議以失貨時我國從人與彼國館夫欲使兩造對覈公白于 上曰當失銀之時譯輩旣未執贓徑先呈文致此生事則在國體何可捨譯舌而乃以馬夫對訟乎又曰兩國所爭只在失銀之虛實而彼忽生梗於年久之後者其意未必不在於索貨也我若從而行賂則將啓日後無窮之弊宜先以此嚴飭上並稱善而從之赴查諸譯皆惴惴焉有一時宰疏論公不合專對 上曰叅覈使嚴束象胥乃至被論

於人今若未送金某其曰有國乎荐下 嚴教公猶引義力辭仍命下理責以往役之義公黽勉承膺辭陛曰 上諭曰此事之直在我未可求必畢竟安保無噴言耶爾須善爲之及赴鳳城差官誘脅無所不至公內以訟辨之端潛授我譯外以誠信之道顯責彼人正色危言言動有度殊俗敬憚不能有加於我而只以主客強弱之不敵遷延六十餘日不決朝議咸以爲我無必勝之勢與其許久相持無寧早自屈退 上密諭之公執不可曰如是則我先示弱其於辱國何專以事理爭之查官怒起而不少撓終得兩

解之彼人亦苦之每日叅覈使難人也公便宜應變動中機宜封狀馳啓纖悉無遺雖素毀公者無不佩服及事竣而還 上引對褒之曰使乎使乎不辱君命後數日擢拜同知義禁府事副摠管禮刑曹叅判是時良丁收布爲生民痼疾至庚午 上慨然欲矯救之 親臨正門召百官收議特詢于公曰此事業欲問卿矣公獨請行結外雜役錢之法朝議將先均漁鹽之稅分遣三使於六道畀公以畿海兩路公先從海西行專以益下爲政曰國家之爲此舉將使海民息肩今若重歛以充目前計則非均稅之本意其

如未弊何由是海西稅額視他道最輕漁人鹽戶反增於舊其不急近功而慮在經遠槩如此事未成緒而在道疾作卒于鳳山村舍卽十月初六日也 上聞甚驚悼稱其忠蓋幹局恨未及用於機密令本道優卮喪葬十二月權葬于楊州明年九月移窆于長湍配鳳洞庚坐之原貞夫人韓山李氏判官夏範之女判書忠貞公顯英五世孫柔嘉貞一婦德甚備及至榮貴一心謙慎壽躋九旬久享諸福後公四十五年乙卯終葬于楊州漢灘坐艮之岡生一男華鎮文科吏判出繼伯氏副正公後取從姪寅鎮爲嗣側出

男恒鎮察訪判書二男長啓濂郡守次啓洛文科承旨二女適縣監李洛秀進士鄭文會庶子啓澮庶女歸鄭宅鎬寅鎮一男啓泳啓濂女適都事李永老啓洛二女適崔光憲徐慶輔公風儀軒昂志氣磊落當門闌盈盛之時諸從昆弟一時登揚而孝憲公獨奇公擬以遠器居家悖孝友與人交一於信義及夫策名立朝慨然以國事世道爲己責入則敢言不諱忠愛惓惓出而宣力四方不憚夷險手抉久閉之禁局口抗莫競之強國古所稱可屬大事當一面者公近之矣以是受知 明主行將大用先進如趙豐原李

梧川諸公皆許以國之楨榦士流清議莫不倚而爲重不幸盡悴王事中途隕折知公者多失聲驚慟雖不悅者亦皆爲國惜之斯可見當世負望之隆也公沒未幾判書君妙年登第我 英廟追思先臣之未究用拔置經幄早躋宰列逮我 聖朝眷毗采重其子啓洛又以文學顯不食之報於是乎在矣良浩後進也昔當登庠時公在駕臨顧期許不淺及公下世翌歲而始出身恨未及望後塵挹餘光而得與判書君同周旋於玉署銀臺交誼最深今至老白首同入耆社每說先輩稱公惜公之語未嘗不愴焉傷懷今

托以麗牲之刻義重執役遂不辭而爲之銘曰
金豚鷄林錫土東溟代傳華胄揚于王廷公奮門子
抗志崢嶸早翔臺端大振直聲 至尊動容燭我忱
誠獨排獸闢曉漏丁丁經幄近密日贊平明周咨四
方呻喟皆醒舌戰驕隣斂手息爭如廈有棟如城有
楨張我士類視爲重輕往釐漁稅損上薄征百世永
賴海隅蒼生胡奪之速不復于行去以華蓋來以素
旌街號巷吊白日無晶九重驚盡恨不樞衡有子嗣
興天遺典刑湍水洋洋岡有鳳鳴螭首屹然永賁脩
名

吏曹叅判尹公墓碣銘 并序

公諱東昇字幼進初名東星字曰孺文登第後有所
避改之坡平之尹遠自麗代文肅公瓘平北虜築九
城勲業著太史我朝昭靖公坤爲 獻陵佐命大司
成倬爲已卯宗師又三世有諱昌世舉孝廉積德啓
後始居尼城以子八松諱煌貴贈吏曹叅判八松之
弟諱燿漢城庶尹寔爲公高祖也曾祖諱海舉贈吏
曹叅判祖諱扶戶曹正郎贈吏曹判書考諱彥教成
均生員有文行早卒贈吏曹叅判妣貞夫人新昌孟
氏典簿淑夏之女以 肅宗戊戌生公旣晬而孤伯

氏判書公甫十歲矣孟夫人淑哲有懿範教養而成就之公幼而聰穎好學弱冠遊泮庠以詞賦大鳴二十七中生進兩試二十九捷春塘試卽英廟丙寅也始隸槐院冬選入翰林付檢閱丁卯陞待教秋曠史茂朱之赤裳戊辰兼侍講院說書己巳八月由奉教陞司書庚午歷吏曹郎文學持平正言時有儒臣上陳戒疏上不賜批公抗疏請還入賜批又不報公以爲官是諫言事未承答臺閣羞也遂自劃言地終始二十年焉辛未兵曹辟正郎應製十韻律賜織毛鞍時北關大饑舟移嶺沿粟擇授公爲都事往

董之公馳赴蒜山浦項兩倉督載穀四萬五千石皆利涉凡四朔而竣秋爲京畿都事壬申選元孫講書院左贊讀復入春坊莊獻世子在東宮公殫誠獻規癸酉甲戌五入臺閣皆不就大臣言公文學著名宜久任宮僚還司書兼司書文學時書筵頻曠公屢陳勉言甚誠剴有曰睿候方愆靖處深宮旁有宦嬖之昵外無賓師之接隱獨之地莊敬難持燕私之際非僻易干又曰講學無爲應文之具聽諫毋厭逾耳之規凡猥之言勿留聰聽玩好之物勿近左右語轉激切世子察其誠惘答以字字忠愛七月選

入玉堂拜修撰公自在珥筆受知 聖主及登講席
論說侃侃嘗講萇楚詩奏曰臣遊行列邑民情不堪
丁役反欲生女不堪租賦反願凶年今世若有太師
採詩之法八路蔀屋不知有幾萇楚詩也又講侯人
詩陳近日爵賞之輕褻不幸近於三百赤芾之譏因
進戒曰向日兵郎之施棍吏郎之拿入皆過舉也人
君使臣當御以禮義養以廉恥不宜驅之以威刑
上亟稱善深示悔意乙亥四月持斧嶺南窮閭絕峽
足跡殆遍不憚暑潦靡有遺隱貪污雖強不貸奸豪
雖遠必按一道肅然稱真御史梁山等八邑大饑民

將蕩析公用汲黯故事發倉穀千五百石以賑救歸
以擅分自引坐罷丙子屢爲春坊兼官其爲掌令也
上以 東宮久曠賓對而臺臣無諫者下責諭曰臣
下不匡其刑墨公上書引咎曰臣罪當墨豈待今日
而知宜伏常刑以儆有位而乃今 聖德含容當律
倖道於刻涅 嚴教實代於斧鉞 上覽而嘉之曰
人臣義當如是東宮亦必警省矣其後屢稱之曰今
日朝廷知有墨刑者尹某一人而已夏歷宗簿正副
校理兼中學教授十月以執義奉命廉畿甸關東時
兩道荐饑而淮陽金城尤甚方秋民流散殆空公招

集布諭仍狀請移嶺北粟以備賑賑盡免其田租身
布二邑賴復爲官各立石紀惠丁丑正月復命除應
教檢詳舍人輔德十二月差 列聖誌狀校正官戊
寅以別兼春秋攷史于江都以證逸訛六月同諸僚
進成書以勞加通政階拜承政院同副承旨乍遞旋
授是歲凡五入間爲兵曹叅知公處喉司敏於筆翰
嫻於敷納 上倚任之尤重其文詞凡有科試輒命
叅考已卯爲養乞外拜谷山府使峽陋人不知學公
選士居業置學田躬講試有文翁之化廟堂薦授水
原府使時邑改量田久未勘籍公條劃經理躬履畝

查隱伏訖事以聞 上命籌堂往審而歸奏稱其綜
密公自峽邑移畿輔變寬以嚴刮弊勵俗百務畢舉
辛巳適壬午入銀臺者十間移戶兵曹叅議癸未拜
成均館大司成秋特除廣州府尹十二月移授忠清
監司湖是桑梓之鄉人慮其難治公屏人客杜請托
秉公約已每有狀奏 上輒稱分數明乙酉有奉命
而藉輿勢者公不禮之且將按其濫把駟騎其人謀
先發誣以國忌日張樂論罷 上語大臣曰此人決
不爲此遣近臣廉之事遂白特敘三入銀臺騎省丙
戌通擬三銓時有投疏撼銓地者以一句中傷公

上燭其狀黜言者丁亥正月拜刑曹叅議大司成二月丁母夫人憂執制如禮已丑服闋除敦寧都正兵工刑禮叅議大司成復拜吏曹引義免至庚寅屢入銀臺殆無一月閒十二月除全羅監司公再膺藩寄治法嫻熟益殫誠勵精治聲彰聞 上每覽狀奏曰予忘湖南憂矣辛卯冬朝廷建 肇慶廟于全州命公董之事重而期促公方便經理未兩月而功幾訖勘簿無闕既還卽敘拜工曹叅議承旨竟以敦匠勞晉秩嘉善序陞知申事漢城右尹壬辰由刑曹叅判三入知申特除吏曹叅判引前事力辭又除兵禮叅

判大司成差冬至副使歷大司憲戶曹叅判將出疆公兄判書曾以陳奏使赴燕 上手書賜詩有兩年昆弟豈徒然之句人皆榮之癸巳三月還朝閏月復入知申四月感疾公素清瘦瘁遠役竟以是月二十日不起朝紳無不驚惜 上下旨隱卒特解伯氏西伯俾及於臨壙異數也又 親製文致祭畧曰惟卿志氣一段正直豈特才諳亦有文學其識通透當事敏給嗚呼暮年蓋臣闕一其後 臨筵屢發嗟惜之教至日思其父欲見其子戴帽可調補桂坊命板揭于書筵廳子光濩纔去喪卽除洗馬此可以觀君臣

之際矣以七月甲申葬于龍仁水清里甲寅三月移厝于永同魚麗山耆莊村西坐之原初配貞夫人豐壤趙氏判敦寧錫命之女舉一男與公同年生卒於癸亥後從公葬右祔後配貞夫人高靈朴氏叅奉社衍之女亦舉一男長男光素娶而天次光濩前牧使公天姿特異骨清而神秀眉眼瑩朗如畫中人見者稱爲瑞物聰慧尤過人五歲受書數過輒誦西堂李公德壽判禮曹時見公於童蒙講席心奇之稱以他日華國手旣長爲詞賦不襲科臼化腐爲神課試屢冠多士治功令者爭取法焉公不自多愈刻意讀書

爲古文簡嚴峭勁疏章精切曲暢尋常狀牒簡札不輕下一字人謂其綴文如酷吏勘獄卒以詞學雅望結知 明主起自孤逸平步名塗士流倚以爲重平生以不逮嚴顏爲至痛致虔於享祀每日晨謁風雨不廢事慈親有至誠深愛及喪哭擗哀毀如不欲生吊者爲之動容旣登朝貞介自持不喜隨勢俯仰方厚謙張甚舉朝皆傾公家比巷而一不跡其門愛君憂國出於性以竭忠補闕爲已任旣入春坊 東宮臨下以莊賓僚嚴不敢盡懷惟公正色匡拂多人所難言然終亦不忤 睿旨嘗從容諭曰余有過失君

輒當面盡言出不告於人是真愛我也暨丁丑間羣
不逞媒孽 兩宮公心痛之 上嘗引見春坊官公
盛言 東宮仁孝好學之實覬以感 上意壬午之
變公罷官家居語族兄領相公曰十餘年臣事之地
遭此變不得一言爭救臣分掃地盡矣流涕幾於失
聲其在銀臺隨事獻替頗以特旨賜對當出外也
上輒曰久不見尹某予甚思之嘗入侍有爲孽臣沈
翔雲建議追罷其已死父繼後以洗釁者 上詢筵
臣皆依違不可否公獨陳彛倫之重禮律之嚴人皆
聳聽有一宗臣子將特授玉堂公停筆不書曰中批

本非美事而清華之選先及宗戚臣竊惜之 上嘉
納焉其居外也始到錦營見獄簿盈几嘆曰此必有
抱冤者不可一日滯也乃親按而撮其疑會剛能守
宰閱實而出入之傅生者十餘輩內浦勢族盤據暴
橫已百餘年公廉得其強禦難制者峻繩之以法羣
豪爲之斂戢完營時以漕船數少國家經用不繼請
於羣山勅造十艦量腹受穀準嶺南例條劃甚詳
上悉從之度支至今賴焉營庫有販殖之規典裨引
例請之公笑而斥之曰方伯而賈豎爲乎營下稱以
近世未見良浩與公齒相隣家同塾甫冠已從遊於

文墨每於芹宮戰藝同二三子連裾共研惟公才思
絕人操觚鍊句淘金琢玉未嘗不矐然推服性清修
諒直見人不韙去之若浼處朋友惇惇不苟同人以
是重之及夫釋褐聯武於金閨銀臺之間見公入而
啓沃出而代草特超流輩敏而無華簡而當理 聖
主常虛襟而傾聽焉一日同入筵席公有覆難之言
上初未肯可及退未下階呼使前曰予未之思爾言
誠然誠然其契遇之深類如此惜乎天不假年竟未
究大用斯通朝之所共盡而獨余別有所憾憾者方
公之病在簣余再就見焉握手吐情素無言不到念

末路之多艱戒出處之必慎欵欵良規心焉佩服未
幾日而公逝矣余走位哭作楚語而抒哀白首冥行
蹙蹙乎靡騁疇昔之言琅然在耳今公胤子持素谷
尹公所爲狀徵銘於余一篇鋪列皆吾所親見者不
覺悽然而增感遂揮涕而敘之系以銘曰

孔門論士厥科有四惟政與文鮮能兼二乃如之人
獨咸數器入處帷幄敷華賁治出殿方岳摧強振瘁
懇懇忠赤粵自雷肆當言不匡惟墨之恥正色周行
鸞翔鵠峙何天之衢風折其翅國喪蓋臣朝亡吉士
至尊典思祿及孤穉詞林失型善類何恃辭如織貝

玉溪集 卷二十八
識則洞髓良玉破璞新荷出水入地不化英英者氣
故人勒石我顏無愧

左承旨成公墓碣銘

并序

公諱範錫字公敘昌寧之成起麗季大顯于我朝世
有名德大司憲思肅公諱世純生聽松先生諱守琛
諡文貞是生牛溪先生諱渾諡文簡生諱文濬永同
縣監號滄浪贈吏曹判書卽公高祖也會祖諱櫟司
宰監僉正贈左承旨祖諱熙胄尙衣院僉正贈大司
憲以司宰公弟知中樞諱櫻仲子承宗嗣考諱至敏
掌樂院僉正號守拙堂元配豐壤趙氏縣令持綱之

女繼配清州韓氏松之女公韓夫人出也以 肅廟
戊寅三月二十七日生公自幼遊戲嶷然如巨人及
長出遊士林風標動儕流丁酉遭父憂葬于新昌居
墓側終三年遂挈家而至扁其屋曰遠志菴靜坐讀
古人書以親老勉就舉業庚戌擢庭試選槐院辛亥
除濟原察訪癸丑薦拜承政院注書甲寅春以親政
勞陞成均館典籍遷兵曹佐郎正郎拜司憲府持平
時有亡命罪人李鳳祥移配之命公發啓爭執抵觸
時諱辭語峻正 上雖不允而公議多之乙卯出爲
龍崗縣令割廩供士勸課詩書春秋設養老宴躬授

珠溪集 卷二十八
杖舉觴遠近觀感三年而治化興行丁巳召拜司諫
院正言傾一邑送餞至有揮淚者相與勒石頌之戊
午又拜正言大司諫金致屋投疏售黨習公斥其儉
邪 上優答之刊致屋法從之列仍命烏配右致屋
者羣起攻公 上并竄逐而又削公職以鎮之居數
月敘拜侍講院司書文學癸亥出爲公山判官乙丑
以弼善召還秋館學生上疏語多失當 上震怒并
命拿鞫 親御帳殿諸臣無敢諫者公方直春坊特
除掌令趣令人侍或戒公勿言公笑曰 主上爲此
過舉有言責者其可緘口乎遂入對抗言論救 上

厲聲曰是成某乎亟命遠竄又曰某也予固慮之矣
蓋公前後居臺遇事敢言故也咫尺天威觀者無不
代怖而公舉止安舒少無摧沮色人益偉之是夕
上意稍解命改竄爲削明年特敘爲輔德 上臨便
殿命 東宮侍坐召入直宮官進講公讀七月篇訖
仍陳稼穡艱難之義附以規諷言甚切至 上動容
稱善顧謂 東宮曰輔養得人吾無憂矣冬拜安州
牧使未幾罷歸亦有去思碑丁卯選入弘文館爲副
校理戊辰摸 肅考御容以大祝勞陞通政階拜戶
曹叅議移承政院同副承旨頃之因廟剝授水原府

使地是畿輔重鎮物衆務鉅公持之以嚴莅之以簡
戎備修而治聲著明年以親病棄歸攀車挽行者數
百輩訴備局而請留是後屢入銀臺至左承旨出納
敷奏大爲 上器重庚午 上將設均役廳臨門博
詢公備陳日後弊本凡十餘條不數年而如公言以
辛未九月八日歿壽厯五十四葬于新昌戊子改卜
於高陽之蟾巖甲坐原與夫人合窆焉公修幹偉貌
風度凝遠言論和平秉心純慤坦然無表裏常曰司
馬公平生未嘗有不可對人言者吾竊慕焉惇於孝
友太夫人年旣高盡其忠養每遇佳辰盛酒饌與家

人上壽爲嬰兒戲以悅之有弟妹貧甚飢寒與其嫁
娶子女如已出推而及於親戚皆以依歸篤於故舊
嘗有病疫者出入救視躬親醫藥人稱其長德簡名
利審取與其在西路燕价求一裘嫌其當路也不與
焉屢典大邑而田廬無增及喪篋無餘衣吊者莫不
嗟歎夫人星州李氏正郎世璉之女承旨壙之曾孫
英明端淑有女士風治家勤儉爲閨門良佐生於丙
子後公十四年卒舉一男一女男德求德山縣監以
孝行旌閭女歸通德郎金孝常有系子正容一女歸
沈鍾庶女歸黃仁勲德求二男三女長鼎柱縣令次

肯柱縣監女長歸趙樂鎮次歸生員林長浩次歸李文鎬鼎柱二男近默次幼二女歸鄭海容金漢鍾肯柱三男長進默次退默次幼一女歸尹元鎮良浩釋褐於公歿之翌歲未及躡塵於朝行而得聞先進之言咸以公器局才猷未獲展布深加歎惜今縣令君賣公事行來請麗牲之辭義不敢辭謹敘次而爲之銘銘曰

行淳於家政清於官諤諤其舌有豸其冠不抗不攜鶚立朝端人方逐逐我獨閒閒命不才謀祿以年慳歸餘于後有銘在山

左承旨旅庵申公墓碣銘

并序

申舜民天下士也其學無所不通其才足以大受而遇知 明主終不得展所蘊君子惜之舜民諱景濬號旅庵本高靈大姓其先多賢人名宦至我 世祖朝有大司諫末舟以佐命元勳叔舟之弟棄官歸淳昌之南山子孫仍居焉有孫曰左贊成公濟能世其賢三傳至主簿濂以孝旌閭事載三綱行實子叅奉克淳寔爲公高祖曾祖諱灑大父察訪諱善泳考諱涑妣韓山李氏進士儀鴻女公生於 肅宗壬辰四月十五日幼有異才五歲讀詩經稍長博學強記庭

耳溪集 卷二十八
有老杏久無實公爲文責之是歲子忽繁鄉人異之
公爲人沉深有大志嘗曰大丈夫生斯世天下事皆
吾職一物未格恥也一藝不能病也遂自聖人書潛
心探蹟得其大指汎濫于九流二教以至天官職方
聲律醫卜之學歷代憲章海外奇僻之書靡不鉤其
奧而挈其要於本國山川道里尤瞭然如在目中曰
凡爲將者須先識地利其自任如此戊午移家素沙
著素沙問答辛酉移稷山著稷書皆觀物悟理之言
而多深造獨見者甲子還淳昌嘗應舉發解偶遊智
異山樂之遂不赴會圍甲戌夏擢增廣乙科隸承文

院拜 徽陵別檢例陞成均典籍轉兵禮曹郎庚辰
除司諫院正言尋爲吏曹郎遷司憲府掌令壬午春
出知瑞山郡丁大饑削廩備賑煮鹽易粟闔境無流
瘠明年召還郡男女老穉啼呼擁路願留衣祠之公
笑而却之道移忠清都事掌試事明年留監漕運期
滿歸再除掌令皆以在鄉遞其冬又出監長淵縣應
旨進民隱詩 上亟稱其文辭公爲治外寬內明能
折伏姦隱嘗坐衙令軍校曰某方幾里某林中有盜
禦人期明朝執來校往得盜如公言近歲爲是縣者
多以罪去傳言衙後山有隱瘞者以是不利於官而

耳溪集 卷二十八
終莫得其處公一日散步遊後山令吏掘一處無所得後夜又令掘其旁若干步又無所得第三夜乃部校伏山路曰有異棺過者勿問但誦其爲誰其夜果有異過者乃縣之猾吏也視其壙當兩掘之間邑人皆伏以爲神乙酉以獻納召尋拜通禮丁亥陞司諫會諫官在外者多公坐謫沔川一歲放還己丑以宗簿正奉命修江都璿源閣既事歸鄉廬領議政洪鳳漢聞公名諷使入京公不動乃言于 上曰申某經濟之才也辟爲備局郎 上命馳駟召之監修輿地便覽明年拜掌樂正兼備郎如故於是 上又選文

學之士八人纂文獻備考設編輯廳公則掌輿地考上數命公入侍指陳應對多至夜分 上奇之賜酒饌特命地部惠廳給錢米兩軍門繼薪炭以周旅食之艱公固辭數月乃止是夏書成 上親序卷首乃曰是書之輯某也功爲多特加通政階擢承政院同副承旨旋移兵曹叅知命監修八道地圖旣成作障掛殿中以是 上益知公多聞多才可大用命擇善地試吏才又除承旨嘗從容入對 上喟然歎曰何相見之晚也承旨髮白予則大耋君臣遭遇遲暮可恨又問承旨有親乎對曰父母俱不在 上爲之感

王溪集 卷二十八
然因諭之曰今爾所事惟予一人毋捨予以遠也時
有臺臣崔益男疏論領相金致仁 上召公問是非
公唯唯三問而三不對 上默然罷朝命竄公湖沿
蓋疏中有難言者公不欲斥言之也初配恩津 上
問地近湖南耶恐申某從此歸矣改命水原未幾宥
公自是僦舍京城不敢有歸意辛卯春復除承旨旋
拜北青府使北俗樸甚無文公聚秀民于校宮親自
講授行鄉射禮士民圍觀稍知親上敬長之義癸巳
遞入政院序陞至左承旨無何除江界府使江界西
塞雄府也有媚公者劾之曰文識裕而事務疎公引

義遞其秋出知順天府順與淳地相錯親戚故舊日
扶携歸公資給無倦色而裁切一任法焉明年夏改
濟州牧使時公年已六十有三人多愍之公怡然就
途曰 君命敢言夷險耶居一年與御史洪相聖爭
事罷拿 上察其狀卽原之丙申 英廟上賓旣因
山公猶素食每說 先朝事輒言淚俱下至己亥公
告人曰余受知 先王屢奉恩言故不忍遠離今三
年已畢可以歸矣遂退居南山舊廬溫繹圖書消搖
林壑泊然無世念五典郡府不營家私破屋荒田蔬
糲不繼處之怡然庚子三除承宣皆不赴明年夏忽

語二子曰余近覺氣憊殆不久乎因歷敘平生事甚
悉翌日與客棊微眩就床臥移時翛然而逝時辛丑
五月二十一日也越三月某日葬于南山某坐之原
公凡三娶元配廣州李氏蔭郎亨晚女早卒無子次
配江陵崔氏學生惇五女後配平昌李氏蔭郎光灤
女有二男三女長女歸進士李永甲崔出男在權斗
權二女歸李浩淵尹致鼎並李出余於甲戌春掌試
湖南二守令爲副余問本道知名士爲誰僉曰有淳
昌申某者南士之冠也得此一人足侈一榜矣旣開
場發策問車制見晚呈一券余擊案曰吾得申某矣

二副曰何以知之余笑曰第觀之遂擢置第一及圻
名果然二副皆驚至會試又中高選余就見于邸信
魁奇士也遂與定交公居京罕與人遊惟余之從討
論墳典上下今古不知日之夕而夜之永也或留連
數日興盡而返余亦携壺策驢時造南郭之僑居公
方把管著書兀然專精不覺戶外之有客也乃驩然
迎笑引數酌出示草藁縱橫問難旣而曰子謂我多
見書耶書雖多無益於已特記問之學耳學貴見道
道在自得孟子曰心之官思思則得之不思則不得
管子曰思之思之鬼神其通之是自得之法也蓋其

學博而知要志高而務實旁羅百氏而折衷於吾道至若析理辨疑則直抉幽眇皆前人所未道今人所不能言者余未嘗不斂衽而驚服或有犁然暗契不言而自喻者公亦爲之欣然拊掌喜知己之有人也古所謂同心之言其臭如蘭者非耶公旣宦遊四方余亦閱歷險屯合散無常而雖在千里無異對面三十年如一日焉曩余左官北塞公亦南歸一別五年遂不復相見矣每念平昔愴怳永歎今公女婿李永甲門人柳肅之列公事行來諭余曰非公誰當銘旅菴者余曰然吾固待之矣遂揮涕而敘之公之文章

余嘗序其遺集茲不復論所著述極多如儀表圖類仰圖疆界志山水經道路考日本證韻諺書音解諸書皆可傳于後斯可見其學之富而於公猶是糠粃云銘曰

昔吾夫子登泰山而小天下天下豈小泰山之高也然是九州之天下非謂寰海之四大彼四大之至大豈泰山之能小君子以求道在縱觀乎高妙若有人兮大膽直鉤深而瞭遠物無隱而未劈蓋不限於聞見炯炯兮慧性犖犖兮隻眼惟茲數尺之頑石將以護未化之形曷能助無窮之名耶

右副承旨止齋李公墓碣銘 并序

公李氏諱延德字子新全義人上祖太師棹佐麗太祖策壁上功臣代有聞人入本朝始居全州世以文顯佐郎效忠魁鼎甲修撰承孝選湖堂全州府尹贈判書廷鸞以節行事業載名臣傳寔公高祖也贈贊成諱遵吉贈領議政諱榮先以子晚庵公貴推恩三世晚庵諱尙真以德望爲近世名相卽公仲父也考諱尙隣漢城庶尹初娶文化柳氏不育再娶水原崔氏宣傳官厚發之女以 肅廟壬戌三月十日生公幼而才氣出凡晚庵公大器之甫冠謁明齋尹先生

先生詡之以有故相風自此專心經學間就科塲聲聞自播 英宗戊申卿宰交薦授 齊陵叅奉尋授慶基殿轉 寧陵序陞 宗廟奉事尙瑞直長典設別提移禁府都事掌樂主簿出爲龍宮縣監政稱廉平丙辰擢庭試丙科朝廷賀得人卽拜司憲府持平免歸鄉丁巳復拜時李顯弼以對策不正見削時論延及主試人公疏陳曰奪其科不足而投之裔罪其人不足而並及掌試之臣是 殿下私意未祛喜怒不中適趙相公顯命䟽同入激 上意削其職三載不復庚申宋左相寅明啓差訓局郎辛酉 上命召

耳溪集 卷二十八
諸錢穀司郎官問一年出入數幾何公條奏甚詳
上曰李某會聞有才具今所陳可驗其舉職後以講
試入侍適樂院告新鐘成 上問公曰爾知樂否勿
讓也公對曰臣少時粗習籌法欲推之律呂而未能
解然惟聲入心通然後乃可議樂豈以尺寸較量而
得之乎 上命差雅樂廳郎教曰聲入心通一語可
見其留心於樂理矣公屢辭不獲乃取新舊律尺損
益之及告成 上謂曰爾試言音律之理對曰五聲
八音十二律正變倍半之理畧究糟粕而終未能豁
然通悟其中笙簧出自上古四清聲一如鐘磬且有

閩管而我國不解造法貿來燕市高下清濁率相反
故臣就應鍾清夾鍾二管依本律別造則其聲乃諧
矣 上曰彼中多欺我人更送典樂官問之可也冬
典樂入燕質問如公指彼人不能諱始出示本法較
諸新造無少差史官書諸寶鑑 上親序樂學軌範
特舉此事以美之命授準職獎之曰某也可比於
世宗朝朴堧矣陞拜司憲府掌令壬戌移侍講院弼
善特拜掌樂正尋移文學 上曰李某不可離春坊
也乃以文學兼掌樂正公以兼管無例屢疏辭間移
臺職仍帶樂任時有天災中外癘氣熾公疏請行禱

名山 上嘉納之遣近臣分禱諸道仍爲後式癸亥
復拜弼善是時 王世子將冠妙選宮僚而公例兼
禮貌官儀節悉合古禮觀者稱之甲子授吉州牧使
辭遞旋拜天安郡守數月以改造殿庭樂器召還乙
丑拜輔德時 上述常訓教 東宮命承旨玉堂就
公解釋訓義錫馬以褒之間除宗簿正執義司諫丙
寅特授同副承旨曰質實哉若人公在院數進言有
觸時諱者 上只遞其職而不深罪也尋除掌隸院
判決事移右副承旨丁卯除密陽府使地廣難治莅
以清慎是時治送日本信使酬應旁午一取官廩不

以煩民臺臣忽以衰病滯務論斥下 批不從曰與
予所知正相反承旨李宗迪曰聞其爲治多行古道
今人安知其貴公聞之笑曰吾旣衰矣人言是也遂
棄歸蓋公堂姪宇夏嘗以直言擊權宰一門盡被其
噬公之跲於宦蓋坐此已巳除判決事值 東宮代
理入城肅恩上書陳戒衍進大學首陳格致誠正之
道而至治平則言王安石新法之弊末乃盛陳遠佞
人之戒蓋有意而發時人多有忌嫉者庚午秋 上
幸溫泉公適感疾扶曳候路左自是漸頓竟以十一
月二十日終葬于府西松山公少日頗俊逸不羈旣

知爲學深自矯揉行有繩尺識通理數而持之若愚
惟務躬行不喜論述早孤奉偏慈盡忠愛及喪廬墓
啜粥鄉黨稱其孝廉靜寡欲隨衆應舉不以得失嬰
懷嘗有主司聞公才學物色之公製策幾就聞之折
券而出屢典州縣歸裝蕭然陋居菲食扁其齋曰知
止惟以經籍自娛學以窮格爲要旁通陰陽律曆如
樂器考正特其一事耳辛酉造磬時宮中得古磬合
於律呂文廟有黃鍾一枚缺罅聲不完公用此取準
鑄鐘用倭銅不成會遂安地產新銅取鑄乃成人皆
異之公素有重名趙公顯命朴公文秀相謂曰此人

若當緩急可展其才而平時則不能用奈何人或
聞名來叩者輒默然不應故胷中之蘊鮮有知者夫
人朔寧崔氏持平致翁之女舉三男宇岳宇益宇爽
宇岳一男一聖女歸鄭東殷宇益生員二男長協聖
今郡守次偁聖女歸都事尹光柱宇爽男文聖一聖
無嗣取協聖子揆泰子之鄭男一容女長歸應教趙
弘鎮尹男恒基性基心基不佞少也嘗拜公於他席
器宇沉靜言語恂恂知其爲篤厚長者恨未及質其
所存側聽於先輩之言咸以博識宏才屬公而受知
聖主阨於時而無所施寧不惜哉今郡守君列公事

行來徵樹墓之辭余雖非立言者慕公之深樂為之敘銘曰

學粹而不矜於外才博而不名於藝聲非不揚而人莫測其際官非不顯而視進如退明而用晦卷而无悔坤止之廬有琴有書過其門者不知為大夫之閭入其室者疑其為處士之居今之人歎古之人歎我銘其墟不知名之所於

大司諫西州曹公墓碣銘 并序

我王考芸窩府君以文章名世晚節與趙后溪李槎川諸公結詩社良辰淑景選日迭會文采風流照暎

一代人比之香山東洛之勝而維時西州曹公以詞林後進援司馬公故事昂然登席唱酬聯翩往往發驚人句當世傳為美談良浩幼時隅坐奉杖几至今歷歷在眼西州孫侍郎君疏公遺事來屬麗牲之辭撫念疇昔為之愴然謹按狀而敘之公諱夏望字雅仲昌寧人新羅駙馬繼龍之後歷高麗有八世平章逮我朝節義勲伐奕世相望曾祖諱文秀詞翰有盛名號雪汀官工曹叅判夏寧君祖諱漢英以持平抗義斥和被拘燕獄三年不屈而還名聞夷夏卒官禮曹叅判襲爵夏興君贈諡文忠考諱憲周金溝縣令

妣贈貞夫人延安李氏大提學一相之女月沙文忠公之曾孫縣令公疾劇服毒藥先卒以烈女旌閭以肅廟壬戌生公英秀出凡眉眼如畫嘗從塾師受會氏史畧自戰國以後不煩指授人稱神童甫踰十歲連喪考妣哭泣哀慕之中猶日夜劬書一覽成誦稍長以氣自豪慕古人奇節視世俗亡如也乃載書入山寺數年而歸勉就泮庠每試居前至於二十餘魁名聲大振辛卯登進士試第一生員試二等國俗以進士魁元爲峻選非文學地望服一世者莫能擬議旣坼名李公宗城居二人或惜之金尙書鎮圭主試

笑曰彼不幸而逢此人誰敢爭先其負士望如此壬寅除章陵叅奉不肯就癸卯拜童蒙教官不得已應命移禁府都事因事遞丙午拜司宰監奉事棄歸驪江別墅優游林泉歲餘復拜禁府換掌苑奉事陞長興直長嶺賊平以盟府奉血官陞主簿遷工曹佐郎已酉出宰宜寧縣當辛壬大侵辦穀數千斛計口分賑一境無瘠癸丑與新按使不相能投紱而歸民鑿石頌之丙辰擢庭試第一甲用蔭路資窮直陞通政付西樞卽拜判決事移兵曹叅知遷承政院同副承旨上御晝講命公陳經旨公引物比類剖析精

微因文生義兼進規戒 上嘉納之後日臨講特召
公曰夙聞文學曩知其深於易也冬乞暇省墓于驪
湖 上促令還朝時值 親臨議囚文案煩猥 上
顧謂公曰非爾莫可特命換刑房稱旨 上亟嘉賞
焉丁巳除茂朱府使己未遞拜禮曹叅議東遊金剛
未還除承旨尋適庚申庭請徽號五啓不允將進六
啓館閣諸公辭竭莫能秉筆日已晏矣公以軍衙在
班大臣屬公製進卽席揮毫展紙鳴颯颯頃刻而就
滿座環視稱善啓卽蒙允咸嘖嘖曰此令之尙遲文
任朝廷之過也辛酉拜大司諫夏薦爲廣州府尹尋

罷去壬戌知江陵府重建鏡浦臺暇日嘯詠所製上
樑文膾炙一時甲子病遞乙丑廟堂啓差承文院副
提調因辭職極陳時弊曰科制也官方也良役也戎
政也革舊改制條列中窾 上優批褒之因除兵曹
叅議公少因夜讀患眼眚晚年益劇求清涼地丙寅
爲寧越府使覽古典感發於吟詠有一聯曰從古越
中三讓地祇今江上九疑山一時傳誦以爲越中前
無此作又於錦江亭步板上韻其兩聯曰錦水亭空
明月在碧桃花落故人來紗籠古壁蛛絲老霞珮朝
元鶴羽催流傳都下俞侍郎健基擊節朗誦曰俱是

仙語此老殆不久於世耶居歲餘棄歸楊湖庄感疾就醫于京竟以七月初四日不起享年六十六九月葬于楊根水南後十年移卜于驪州檀山里負午之原夫人德水李氏縣監泰鎮之女吏曹判書大提學澤堂諱植之玄孫聰慧通敏孝悌睦嫻有女士範生於癸亥卒於辛亥始葬於檀山南及公歿移柩焉竊覲公脩幹鶴立有出塵之表性度亢爽高視獨行於人少許可記性超羣博通古今文場酒席談論焱發常傾一座文辭浩瀚各體徧長尤善於詩雖一韻百篇滄滄若宿構高華警絕詞苑老匠皆歛衽推讓然

亦不自貴重常曰文不過稱其意氣而已刻畫藻飾蘄以傳後者亦俗爾揮灑淋漓賤墨錯落而輒棄不顧以故篇什多散佚只餘若干卷藏于家始公自韋布負重名一世期之以潤色鴻猷高步館閣及夫遲晚通籍後生少年布列公卿不肯低徊下僚每求外補自放於山水當路者或惜其沉屈公笑應曰此君輩事於老夫何與以是人多目之以倨傲官遂不顯然心輕爵祿不求合於時識者以是益高之後賜祭文有曰陳同吐氣蒼髮差池退之得謗名亦相隨於此可見公之本末矣逮夫暮年公議難遏朝廷將以

清要處之槐院副提蓋是極選而爲文苑主盟階也
未久而公遽逝人莫不咨嗟歎惜平生以早失怙恃
祿不逮養爲至痛其典郡邑必權奉祠版每值喪餘
前一朔居宿於外齋沐行祀親檢饜羞誠敬哀慕有
足感動人者友同氣甚篤事仲兄如嚴父保妹弟如
嬰兒撫視遺孤如已出此其內行之懿也凡舉五男
長命九有文行纔冠而夭次命五有三男一女男允
世允厚允恒女歸洪樂恒文科今叅議允世子曰學
振有孫錫路實尸公祀次命百有一男三女男允美
女歸吳琬成觀柱趙綱采允美子曰玄振次命億縣

監有三男二女男允邁允邁縣監允遂今校理女歸
尹光心今郡守尹寅植允邁子曰始振好振允邁子
曰鴻振進士次命峻郡守出爲季父后有一男允大
文科今叅判允大子曰鳳振餘皆幼銘曰
士以志操爲重文以氣韻爲宗志高則無所充詘氣
昌則發之春容自古攸難今見于公升魁多士不自
爲工再冠大庭冀北遂空丹桂孤挺秀出灌叢瓦缶
亂鳴獨戛球鐘簪組土芥山水朋從驅湖清駛越崑
龍從豪吟大唱光恠干虹霞珮飄然四尺遺封

兵曹叅議任公墓碣銘

并序

余於癸未秋之官龍灣大同丞任公才解郵銜移亞使留滬上驩然出迎仍泛舟遊於清流之壁朝天之石乘月歸練光亭徵歌選舞極意佚宕公舉酒謂余曰以公之才若學不偶於時浮沉州郡而終必展步武十數年後當作此道主人余笑而漫應之公既歿而其言果驗及持節到滬追憶前日事未嘗不嘆公藻識之明而竊有見知之感今公冢孫命常賫事行來請樹墓之辭余方老拋筆硯而義不敢辭按其狀公諱毅中字士剛自高麗御史大夫澍始籍豐川入本朝冠纓蟬嫣爲盛族有諱碩齡官江原觀察使號

石江於公爲五世祖也高祖諱景莘禁火司別坐曾祖諱耆林川郡守祖諱震成通德郎考諱思遠娶青松沈氏渙女舉公於 肅宗乙亥四歲喪母夫人鞠於外氏幼聰穎不煩課督爲文辭天分甚高尤長於詩少遊塲屋儕流推其瞻麗工於筆藝十餘歲時善書者皆推以爲不可及 英廟丁未登司馬而久屈於公車丙子秋始中耆老科卽付成均典籍移平市令拜兵曹郎以禁喧入侍 上問年教曰可人可人是冬除固城縣令 上問汝爲能吏乎良吏乎對曰良能非所敢當而治固多術槩欲以七事爲綱領焉

上曰語甚純實宜善治矣居縣二年吏民便之以稅船臭載照法拿罷民惜其去郡訴於按使請借不得辛巳夏拜持平陞掌令至壬午連入憲司秋出爲大同察訪郵當西路之衝冠蓋旁午吏卒凋弊會值歲歉貸營錢以賑之旣畢吏稱有剩錢將納官公却之曰豈有賑名而官染指者乎癸未秋遷本道都事掌試事西人饒財射利每當科試奔競成風公痛察而嚴防之榜出一路稱公按使以考試無私書最而褒之是冬拜掌令春登對陳所懷 上嘉其切實未幾特陞通政階翌日試文臣製述仍命參考承旨奏某

未有實職不可爲考官命卽付軍銜及書進 御題上亟稱其善書二月拜分兵曹叅知分曹罷特除叅議冬授同副承旨以年老格外辭不許乙酉春因事適旋拜兵議三月命陞秩因大臣奏格不行夏叅知缺 上把筆良久曰任某非予記則誰復舉乎遂特授之尋以老病呈告歸鄉 上問近在何處已丑八月五日以宿患者終享年七十五十月葬于廣州大得山枕丙之原淑夫人青松沈氏進士宗海女端淑溫粹勤儉持家手操紡績不以耄期暫釋與公同年生後公十三歲卒葬同穴舉一男二女男希百生員

理澤集 卷二十八
壽職僉樞娶柳天興女生一男命常有二男二女皆
幼女長適縣監李錫稷次適朴活源李錫稷生三男
綱源璜源進士良源女歸教官朴宗明公天姿寬和
行已誠實事親孝待宗族厚與朋友信家素貧屢空
平生不治產業惟以文墨自娛常以濟物爲心及爲
大同洞開官門按使爲言西路多客雖以營門猶立
閹禁况郵官乎公曰窮親窘友裹足而來賣衣而歸
他日何顏見也晚好山水有時出遊輒有吟咏人多
傳誦卮齋任公珽伯仲以詞翰名在宗黨從遊久每
見公詩筆稱賞不已而公未嘗以是自居亦可見謙

挹之操矣銘曰

身拖緋玉官不薄兮壽隣頤期年不嗇兮遲暮通籍
施未博兮薄試于外民戴德兮歸臥四壁惟文墨兮
癯容曠度兮安覲兮我筆雖短石不剝兮

耳溪集卷二十八 終

耳溪集卷二十九目

墓碣銘

金堤郡守贈吏曹參議朴公墓碣銘

漢城府庶尹成公墓碣銘

黃州牧使李公墓碣銘

黃州牧使徐公墓碣銘

山清縣監曹公墓碣銘

廣興守贈吏曹參判曹公墓碣銘

稷山縣監權君墓碣銘

知訓鍊院事咸春君李公墓碣銘

三道統禦使許公墓碣銘

訓鍊院判官贈左承旨金公墓碣銘

永宗防禦使贈兵曹叅判金公墓碣銘

昌城防禦使張公墓碣銘

安佐郎墓碣銘

耳溪集卷二十九

墓碣銘

金堤郡守贈吏曹叅議朴公墓碣銘

并序

公諱弼時字碩甫姓朴氏系出新羅爲公族後居羅州之潘南縣遂以爲貫高麗末有諱尙衷負重名世稱潘南先生有子曰峇相本朝諡平度五傳而至諱紹以直道邃學爲已卯名流稱冶川先生有弟曰緝嘗師朴松堂英松堂稱其好學而短命比之顏子竟無子冶川命季子應寅爲嗣官通政都正實公五世祖也郡守諱東緯判官諱栢高曾也承旨諱世燦祖

也。以讜直聞。僉樞諱泰舒考也。以長德稱。後推仲子恩。贈吏曹叅判妣貞夫人光州金氏通德郎萬獻女。以明陵辛未生。公公幼而端重。與羣兒嬉儼然如成人。見者異之。既長。從仲氏大諫。公治舉子業。癸卯中司馬試。戊申丁叅判。公憂。既闋一年。選補健元陵叅奉。陞濟用奉事。轉金吾郎。時鞠獄起。上親訊囚。公敏於傳命。周旋稱旨。尋授水庫別檢例陞。昌陵直長。月滿進六品階。爲刑曹佐郎。視事明審。凡獄之眩未定者。咸歸於公公。一按簿立判。人皆驚服。丙辰拜南平縣監。爲政先教養。十考皆最。方伯御史迭

褒聞。再錫馬以獎。及歸。民伐石頌焉。入爲內資主簿。太廟令。遷戶曹正郎。約已刷弊籍。無漏財吏。不騁奸甲子。守金堤郡。抑宮差。寬漁戶民。以息肩。丙寅。母夫人疾革。公年五十六矣。躬自扶將。晷不交者累月。及喪。哀毀却飢粥。皇皇如不欲生。甫葬。遂不起。卽十二月二十七日也。以丁卯二月某日葬于龍仁水餘面內基枕坤之崗。配龍仁李氏。縣令宜行女。大司諫世勉孫。婉婉有婦德。閭範克備。親黨咸式。生先公二年。歿後公十年。葬從公壙。右舉一男師沃。前羅州牧使。一女適申致恒。側室女郎廳李謙吾妻。牧使娶正字

成德章女無子子從父兄郡守師郁子祐源今吏曹
叅判娶叅判尹得雨女不育再娶士人洪師浩女生
一男幼公歿後三十五年叅判初拜監司恩贈公吏
曹叅議夫人贈淑夫人良浩生也後未及拜公於鄉
黨而宗人之居南平者每論邑大夫之良必先數公
曰不察察爲明而吏不敢欺不煦煦爲恩而民不能
忘不皦皦爲潔而歸無餘貲竊謂有古循吏風焉及
從牧使父子遊牧使居官以治行著叅判立朝以才
學名又識其淵源有自矣今讀家狀益詳公懿行公
性度簡雅不喜交遊平居閉戶泊如也至若孝友天

植也自穉年侍尊公疾左右忠養不離側喪三年盡
制墨而瘁觀者動色仲氏長數歲承事無違志一室
聯床有無與共其在南平仲氏亦宰咸平疆相接也
迭奉大夫人魚軒載路雙蓋在後甘旨交於兩境遠
近爲之觀感與姊妹分俸祿育孤甥婚嫁而成立焉
皆孝之所推也夫聖人之教莫大於善事親其制禮
也莫嚴於善居喪然又以減性爲戒者蓋使賢者俯
而就之也噫公之不勝喪寧不知聖人之戒而惟自
盡於禮則前喪後喪一也年旣衰而志不懈竟至於
殉孝此君子之所傷也况其才若行終不得大展于

王澐集 卷二十九
世人尤以是惜焉然積于躬者必贏于後今叅判君
遭遇盛際揚于王庭門戶自此大矣天之報善人於
是乎不僭也遂爲之銘曰

無所強之謂性莫之違之謂命公篤於親由其性也
終死於孝乃其命也命有消息先闕後慶無善不報
若形有影水餘之川源深流永賢者攸藏孰敢不敬

漢城府庶尹成公墓碣銘 并序

成公諱雲柱字子昭昌寧人鼻祖高麗中尹仁輔生
門下侍中松國膺享勿溪書院四傳諱石因號桑谷
判禮曹典文衡諡靖平又三傳諱任號安齋判吏曹

典文衡諡文安自是冠冕燁赫世有聞人至諱昌秀
有文行贈司僕寺正於公爲曾祖也祖諱壽雄蔭通
政府使考諱德章承文院副正字妣青松沈氏通德
郎壽益之女生考諱德馨佐郎卽正字公伯氏生妣
延安李氏縣監之老女也以 英宗己酉生公姿性
敦重沉靜迥出凡兒己卯中司馬壬午拜 順陵叅
奉甲申以病適丙戌拜義禁府都事換掌苑署奉事
丁亥又移都事戊子轉童蒙教官命率童蒙入侍誦
讀稱旨 上嘉之賜鹿皮一領尋陞敦寧府主簿己
丑丁李夫人憂壬辰拜司僕寺主簿旋除陰竹縣監

未幾病遘丙申甄除翊衛司翊衛刑曹佐郎司饗院
僉正戊戌拜清道郡守剖決如流案無留牘猾吏憚
其嚴明時有量田之命公親自巡檢括白地稅四百
餘結論報方伯方伯以稅額多縮屢退之公確然不
屈以去就爭竟減田案清道民至今賴之在官丁母
憂邑有民賻殆萬緡却不受曰親喪固所自盡安用
民賻爲哉聞者咸歎服闋拜刑曹正郎辛丑除金川
郡守壬寅遞歸癸卯敘拜中部都事司宰監僉正甲
辰移尚衣院僉正工曹正郎差 文孝世子冊封都
監郎廳漢城府庶尹又差延勅都監郎廳旋移司宰

監僉正乙巳除高陽郡守秋換交河郡守糴有舊逋
七百餘斛損俸以充之病遞戊申敘拜司導寺僉正
轉漢城庶尹工曹郎庚戌出爲臨陂縣令縣有寺奴
婢積年逃故虛名十八九徵族而充貢冤聲載路循
襲久莫之能革公嘆曰此非仁人之政只取舊案二
三名以報方伯不聽卽棄官歸癸丑拜 健元陵令
甲寅移司宰僉正病不興葬于坡州梧里先塋負良
之原公天姿冲澹表裏如一平居蕭然儉約自守事
母夫人左右就養竭誠無違與伯氏叅判公友愛篤
摯姊妹五人各盡其道閨闈之間和氣融融翫索書

籍老而不倦嘗書先儒格言付座右以自省焉配豐
壤趙氏通德郎鶴命之女右議政相愚之曾孫也生
一男三女男早夭取族侄安默爲子女適士人尹祐
烈縣監尹載僖郡守李在翼尹祐烈有繼子致臣尹
載僖子復義李在翼子箕鉉不佞少從伯氏侍郎公
遊屢造其居公在左右恭執子弟之禮見其怡愉湛
樂油然而起愛敬之心嘆其有故家規範及公從宦治
有良吏之風又喜不負伯氏之訓伯氏歿公又繼逝
撫念疇昔有時悄悄今其嗣子安默疏公遺事來乞
樹墓之銘余何忍辭銘曰

成氏之先代有名儒風傳故範弟遜兄愉再縮南綬
官瘦民蘇貢絕逋戶田無虛租居煩以約守澹如愚
我思伯氏言不敢誣

黃州牧使李公墓碣銘

并序

三韓之甲姓六而李居其一李有三貫而全義居一
高麗太祖征甄萱將渡錦江有艤船而待者問其姓
錫名棹遂策開國勲世襲高官至本朝有孝靖公貞
幹平簡公禮長名德載國乘有清江先生諱濟臣文
章節行爲 穆陵名臣其曾孫右議政諱行遠清名
雅望爲中興賢相是爲公高祖也會祖諱萬最司饗

奉事祖諱徵海尚州牧使考諱德隣錦山郡守妣慶州金氏慶恩府院君孝簡公柱臣女郡守公無育公以堂姪入爲後羅州牧使諱徵楫 慶基殿叅奉諱德鳳卽公本生祖考考也本生妣潘南朴氏右叅贊泰恒女以 英宗庚戌十二月二十一日生公公諱永培字久之聰俊異凡長老器之癸酉以恩除 長寧殿叅奉蓋金淑人纔卽世 英廟欲以慰 東朝孔懷之情也甲戌陞東部奉事有掖隸屈於訟而怙冒肆惡亟禡其紫衣而杖之如法部內肅然乙亥換濟用監翌年序陞直長已而丁叅奉公憂已卯 仁

元王后祔 廟差監造官陞水庫別提轉掌樂主簿義禁儀賓都事壬午除堤川縣三歲峽邑官民俱安以微事罷歸乙酉復濟用監主簿移 宗廟署令丙戌出守安城郡踰歲有治達四鄰之褒郡有新貴張甚公旣不能禮囚其豪奴而刑之新貴爲亞使愆患方伯置中考遂解歸庚寅除掌苑別提轉 獻陵令辛卯 上特賜恩對仍命陞敘遂拜黃州牧使黃間於兩西之交官居帥府之下冠蓋旁午地大事殷公處之裕如簡獄訟正軍籍繕廨宇革倉剩之謬增官貿之直吏民咸便之時旱禱雨公適患瘡不能動將

吏交謁請替行公曰民命棘矣寧卹身耶卽與往宿
春之地虔誠露禱果獲冥賜一境莫不感頌瓜近解
歸閉門不出以朋酒自娛今 上已亥感疾革呼寫
祭儀及家事數百言神識不亂竟以十月九日終壽
厯五十臘月葬于西郊城山里癸坐之原公姿性和
厚器度坦易事金淑人盡其忠養淑人常抱未亡之
痛而見輒怡然曰吾有嘉兒嘉婦奚羨人之多男乎
及喪哀毀踰節致勤內使之臨饋葬祭盡禮人皆感
歎推以至於奉先收族皆出誠悃仲氏賢而無年公
事孀嫂甚謹撫孤女成立與人交傾倒無城府見人

側媚之態視之若浼有橫罹無辜者極力周恤時有
逆戚恃勢鬻權者與公有姻戚之好要與相款而終
不應彼乃脅持不已而毅然不動人以爲難公少與
吾弟遊雅喜其有大家規度及余按西海節公來牧
黃州每行部到黃見其爲政寬綽振勵不負平日所
知遂携酒登太虛樓驪然道舊故愛其江山曠爽棟
宇軒敞緬想天使之流憩而獨恨楹桷侈朽懼茲樓
之不能久矣余解歸之明年公修葺一新走書告成
余樂爲之記俾揭于壁其後屢持節過黃岡觀其經
營規畫宛如昨日而公不待矣未嘗不愴焉興思今

公胤子大諫君兄弟具公言行來乞樹墓之辭詳而不繁直而不華得狀德之體公可謂有後矣余於是重有感焉淑人延日鄭氏與良之女觀察使始成之玄孫也生先公二年歿後公二十一年及見子婿皆通籍立朝世稱淑媛而賢毋蓋其德器莊溫質行根天在家爲孝女適人爲令妻奉先以敬訓子以義儉於治家厚於悖親克享遐齡子孫盈前人謂公之不盡之報閨門之德與有助焉舉二男三女長文會大司諫次亨會進士女長歸郡守鄭致愚次歸前令朴宗維次歸士人尹宅烈大諫一男一女進士二男皆

幼銘曰

事親則優然其慕立心則坦乎無憂居官則遇剛不吐急人則無困不收世方靡於齷齪我獨處以休休雖長年之未執蓋多福之自求義林之藪公澤所流黃岡之樓公蹟所留令嗣揚美餘慶悠悠太史之辭千歲之丘

黃州牧使徐公墓碣銘

并序

公諱命敏字德仲達城之徐遠自高麗以軍器少尹開爲初祖至諱彌性仕我朝官牧使贈達川府院君生諱居廣武科縣監寔四佳文忠公居正之兄也三

王溪集 卷二十九
傳諱嶰受業於退溪先生以學行名寔生判中樞諱
湑號藥峰爲 宣廟名臣贈領議政諡忠肅生諱景
霄尙 宣廟長女貞慎翁主封達城尉於公爲高祖
也曾祖諱貞履府使贈左贊成祖諱文裕禮曹判書
諡貞簡考諱宗璧黃州牧使妣淑人南原尹氏郡守
翼駿之女以 英宗癸丑生公儀容雅潔神采映發
弱冠文藝夙成辛未丁父憂柴毀骨立癸酉丁母憂
執喪如前己卯中司馬兩試壬午除義禁府都事換
司饗院奉事癸未陞直長掌分院燔磁之役見院屬
食薄而歛繁嘆曰程子云一命之士苟存心愛物必

有所濟豈可以官微而不矯厲民之弊乎乃革謬例
捐俸蠲役院民樹石頌之甲申陞掌樂院主簿乙酉
除甑山縣令甑俗僻陋雖衣冠之族婚嫁不行交拜
之禮公爲輯婚禮儀節以教之又倣栗谷先生學規
揭學宮以風勵邑士戊子陞韓山郡守嚴戢豪右賑
活饑饉己丑遞庚寅除義城縣令因事去辛卯辟爲
戶曹正郎壬辰除載寧郡守郡有疑獄積年未決公
燭其在詳讞而釋之時旱乃雨歲仍熟自是道內疑
獄方伯悉屬之公朝廷例以治民七事戒飭守令公
到官卽製七箴書之屏常目以自警故居官有尺度

事無不舉丙申陞瑞興府使丁酉陞黃州牧使戊戌移平壤庶尹營下地大訟繁素號難治公莅以嚴簡關節不行剖決如流案無滯牘庚子瓜遞辛丑除儀賓府都事病未謝而卒年厯四十九葬于長湍金陵里負辛之原公孝友根天常以早孤爲沒身之慟平居必夙興謁廟奉先盡其誠敬在外不與祭則必齋戒衣冠危坐徹夜事伯氏如嚴父必下堂迎送教子有法不以慈弛喜施與卹窮不倦在外邑闈者無禁故客至如歸七莅腴邑一以廉約自持蘇弊祛瘼輒有張施買田設庫捐廩補役多者千餘緡民受其惠

立碑追思爲治以察民隱正風俗爲先務擇儒生之老成者爲講長肄業校中助其廩食士多成就焉爲文操筆立成詞理贍暢而年三十餘卽廢科劬經尤用力於魯論多有劄錄稗官小說屏不視曰害吾心術也性儉約壽衣不用錦綺遺命薄葬可見其素守然也配淑人溫陽鄭氏郡守昌俞女生於辛亥卒於乙未祔公墓左婦德甚備宗黨咸服舉三男三女長洛修縣令出爲伯氏郡守命敷後次潞修縣令出爲從兄領議政命善後次淇修文科今注書實主公祀女適郡守李田秀趙呂鎮趙濟明側出淵修洛修二

耳溪集 卷二十九
男有珣有璉潞修一男淇修四男並幼女適李德愚
淵修一男幼李田秀二男孟愚仲愚趙呂鎮三男雲
望雲從雲登趙濟明二男德林復林女適鄭基夙不
佞與公有三世之契從遊於羣從昆弟之間公隅坐
隨行眉眼瑩朗舉止端詳許以需世之材公獨不樂
隨俗俯仰蚤棄舉業浮沉於州郡治行皆著不負平
日讀書之志余嘗持節兩西熟聞士民稱頌之語益
恨未得大施而中途傾沒久愈傷惜今其諸子皆穎
秀有聲士林公於是不亡矣列公言行來徵墓道之
辭遂愴然而書于石銘曰

居以吉士出爲良牧何修之潔何年之晉澤流兩西
有穹其石石面可剝民口不啞階茁叢蘭歸餘于扞
我髮雖短我筆不禿

山清縣監曹公墓碣銘

并序

公諱允迪字惠仲昌寧之曹起羅季以太師繼龍爲
肇祖歷高麗世有勲德逮本朝集賢殿副提學尙治
當 莊陵遜位退靖于永川後諡忠貞左贊成繼商
判敦寧府事光遠相繼爲名臣至諱文秀官叅判號
雪汀暨子文忠公諱漢英號晦谷以文章忠節顯並
有文集行于世文忠第二子諱殿周後叔父贈承旨

耳溪集 卷二十九
諱漢相官潭陽府使寔爲公會祖也大父諱夏彥
敬陵叅奉考諱命宗綾州牧使妣楊州趙氏學生榮
益女公以牧使公季弟通德郎諱命寅之子承牧使
公後本生母安東金氏僉正慎行女以 肅廟丁亥
生公幼而端秀警穎十歲通經史爲文辭有古人步
驟十三四荐遭內外艱旣闋屢發解乙卯中司馬已
未以王母命承世父後未幾連喪王母及考丙寅除
萬寧殿叅奉序陞南部奉事司饗直長換典牲直長
旋除宗簿直長以病遞辛未冬以魂室都監郎勞陞
長興主簿移禁府都事掌苑別提南部都事癸酉除

河陽縣監秩滿歸壬午拜龍安縣監居二年因事罷
庚寅除山淸縣監壬辰解歸郊舍素患風痺粹硯竟
以九月二十六日不起葬于驪州五龍谷枕乙之岡
淑人東萊鄭氏叅判錫三之女勤儉有故家矩度當
公寢疾累年積誠調護壬申先公歿移祔焉公天姿
和粹篤於孝弟旣承大宗事王母愛敬兩至牧使公
晚年患風瘖委身床席公先意承順苟可以娛悅者
靡不用極仲父之喪家貧子幼躬營殯葬以至墓石
咸辦奉仲母育二從弟同居二十年庭無間言繼妣
趙氏親黨貧不能自存者極意周卹此公內行之懿

也其在嶺邑也先祖墳塋在永川慈仁者往省增封
植在慶州失傳者因人指告亟往尋驗樹表碣置祭
田在海西之平山者有訟久不決公自京馳往躬履
肺石辭理愿欵訟官語人曰年老大夫跋履數百里
非篤於追遠能如是乎此公奉先之誠也初莅河陽
首蠲無名之稅吏民翕然信服邑小土瘠有廢田數
千頃失水利公捐俸募民穿渠十餘里以引江水躬
董役二旬卒底于成遂爲膏田民號曰曹公堤而立
碑頌之壬午歲大侵龍安爲縣介湖沿民將流亡朝
廷選良吏屬之公會公在驪州 上飭教敦遣之單

騎赴任髻白集車下鵠衣鵠形有不忍視諭以朝廷
德意使安其田里削廩移粟民免蕩析地是曠野無
川澤公教民障堤畜水明年復大旱一境獨不匱水
民到今蒙其澤春夏引諸生於學舍資其薤鹽而課
以功令數年之間文士彬彬焉此及人之利澤也解
歸數年銓官舉擬山清縣監語人曰吾按湖南熟知
龍安之績將爲嶺峽一洗陋俗云山清地荒僻俗椎
鹵素號難治公莅以簡嚴清淨無事乃大修換鵝亭
登臨嘯咏又造小舫沿洄上下暇日遊頭流山登天
王峰觀日出泛蟾江航大洋南至南海錦山渥顏華

正溪集 卷二十九
髮照暎烟霞飄然有出塵之想此居官之風流也性好閒靜不喜城市築室于西郊讀書求志始中司馬也從祖叔父澹雲公佐天官勸之仕公意不屑倣裝入楓嶽蓋其志尙高邁言論亢爽於斯文是非國家義理激切忼慨不肖隨俗俯仰嘗詣外王父辨尼懷事滂源極論明白直截金公不能難 英廟初服有一相臣投劄請頒 先王疾患搢紳有疏斥之議而依違莫敢先公往拜外舅鄭公力贊之鄭公遂抗章痛卞朝野爲之竦動晬日卽 懿陵忌辰也戒家人勿設酒食至周甲日亦然其忠國之誠秉禮之確不

以韋布而有間凡於朝廷得失世道升降輒殷憂永歎或至涕下以故士類屬望先進長德咸期以遠大而阨於公車卒不克展布嗚呼惜哉公有三男四女長羽振前都事次翼振出繼次翬振前牧使女長適教官李惟簡次適洪綱浩次適叅判李義綱次適應教李貞運庶子必振永振爾振羽振男錫倫進士女歸南建岳金裕鎮韓用誠宋尙載翼振男錫駿錫龜錫象錫鳳女歸李良源翬振男錫中文科修撰錫正進士女歸趙性鎮趙雲緒庶子錫衍李惟簡二子錫初善初二女歸尹祥烈韓億衍李義綱繼子日淵女

歸申蔡趙亨鎮洪學淵李貞運子儒冕進士女歸林
雨弼朴楚壽不佞於公有中表之誼焉每見公儀容
豐頤氣像澹雅未嘗不歛衽起敬今其後承蕃昌文
學斐然竊喜不贏于躬而歸餘于後者理不僭矣牧
使君具公事行來徵麗牲之辭義不可退讓遂爲之
銘曰
不離羣以爲高不混俗以爲和身韋布而心宗國跡
城市而志烟霞德蘊於躬行淳於家三牧疲氓萬口
戶歌軒駟無稱視我孰多黃驪之山其石不磨實浮
于辭我銘非華

廣興守贈吏曹叅判曹公墓碣銘

并序

良浩旣製西州麗牲之辭侍郎君又跽而請曰王考
之行誼文章幸蒙執事之大筆發揮之庶幾不泯於
後而惟先人官未顯隱德媿行未能表著於世是不
肖之罪也敢祈一言之重惠焉良浩敬對曰我與君
家有五世之契焉文字之役其何敢辭公家世德官
闕已詳於西州公碣文謹按誌文公諱命峻字安民
雪汀夏寧君諱文秀之玄孫晦谷文忠公諱漢英之
曾孫金溝縣令諱憲周之孫西州諱夏望之第五子
出爲季父諱夏挺後西州公負盛名於世公承訓家

庭藝業夙就屢中解額而不利晚就蔭塗丁酉補繕
工監役戊戌監修關武安廟時賊臣國榮別遣私人
領役倚勢橫恣公不爲禮其人恚構愬以不恪職事
遂致拿削國榮旣敗甲辰設四殿徽號都監差監
造官陞六品階乙巳拜禁府都事丙午出宰恩津縣
丁未大饑捐廩賑一境安堵上賜表裏以獎於
是修廨宇興水利民到今稱之戊申周甲日屆子侍
郎時在銀臺將乞暇南觀上聞之特命公上京受
觴諭方伯給由一世榮之庚戌陞拜海州判官始至
見倉糴皆雜塵土遂捐新官例俸改備海民德之未

一月因微事罷壬子除敦寧判官移司導僉正冬拜
白川郡守換陽智縣監旋仍司導癸丑陞廣興守乙
卯瓜遞丙辰九月二十六日以疾考終享年六十九
以恩例贈吏曹叅判十一月權厝于驪州檀山越二
年戊午四月合封于夫人墓之右西州墓之下面子
之岡公爲人明敏慈良疎坦易直不修邊幅與物無
競篤於事親西州公晚年苦眼眚沉淹床席而左右
服勤不暫離側褻衣廁臉親自澣洗常以不識慈顏
爲至慟享祀盡誠禮居驪湖手種百果以備籩實仲
兄歿一子幼遂奉筵几饋奠盡三年撫視子女資裝

嫁娶至於傾家賣宅厚於宗族無疎戚咸以爲歸其
居官清以自持誠以愛民案無滯牘關節不行故內
外皆著績焉曩余在箕營侍郎爲小尹公來受養余
就見焉每有酒食輒奉邀徵歌選舞談笑佚宕公年
近七耄渥顏清眸步履便健傾倒悃悞天真爛然有
古人風心焉愛重宜乎克享遐祺侍郎旣登要顯進
進不已而公不少待嗚呼惜哉配清州韓氏縣監師
億女孝敬勤儉閨範咸備公少清羸丙子喀血阽危
醫技窮夫人竊言曰病至此吾何忍獨生潛飲毒藥
家人覺之欲急灌解毒之劑夫人却之曰求死得死

何解爲竟不起時年三十未幾公疾漸瘳乃嘆曰嗟
乎殆以身代我也蓋昔夏恩公疾惟幾王姑李夫人
服毒下從夫人常誦慕之至是身親蹈之時稱曹氏
世有烈婦葬於驪州檣山里舉一男允大今天官侍
郎秩亞卿後配白川趙氏錠之女短年不育女適沈
魯曾允大男鳳振銘曰

西州之子晦谷之孫篤於人倫保我天真秉心以直
服官惟勤惠及疎親澤溥饑民內無伎求外絕畦畛
泊然恬愉古人爲鄰恩推貳卿壽近七旬矢志先從
爰有哲媛生祈代某歿歸同原賢嗣揚徽穹石不磷

稷山縣監權君墓碣銘

并序

余與萬妙子爲文字交雖升沉異塗而志氣相契四十年如一日焉萬妙歿余銘其墓畢平生之誼今萬妙之胤稷山君壯年奄忽其子馥累然曳衰來乞墓道之辭白首獨存實有韓公馬少監之感遂揮涕而爲之敘君諱燭字子昇以萬妙之長子出後於從祖叔父器宇醇厚文藝夙就有聲場屋屢占發解嘗以高等人承命入侍 英廟語及先故而獎諭之有除職之命今 上丁酉始中進士試游太學學中有大議論輒就質焉屢擢泮試終未中第乙巳被選應製

上召見諸儒生至君而慰藉甚摯翌年拜 厚陵叅奉戊申陞廣興倉副奉事太倉卽頒祿之司也吏多竊弄君銳意爬剔上官詫以得人庚戌七月陞尙瑞院直長凡都政非 親臨則二郎不得并陞而是月之政特教陞尙衣院主簿實異數也八月副擬戶曹佐郎蒙恩點按逋簿抑濫費謗訕交騰而終不撓辛亥移 長寧殿令轉平市署癸丑遭萬妙喪乙卯以典設司別提未擬受點卽換南部令十月除稷山縣監稷是湖西孔路也百弊俱瘠矯革振刷不一歲而規畫就緒縣有靈沼亭粵昔 顯廟幸溫泉歷臨縣

舍投蓮子於小池未幾青錢浮水面邑人驚異之建亭而錫名後仍作行宮近歲頽廢前守經紀而未及始事君既上官慨然告于衆曰是不可時日淹也召匠計工當費千萬遂告方伯議廟堂捐俸鳩木石躬率官僮掇而新之數月翼然改觀有一土豪犯科蜚語及使司遂以怨謗置下考聞者莫不惋惜是年十二月二十八日以寒疾不起卜得明年二月十七日從葬于原州干川里坐艮原君儀容豐皙處心誠恪有長者風少承宗祀制財產御僮僕綽有規度遇姊姪庶兄弟恩愛周洽庭無間言萬妙公晚年鄉居君

奉養二親志物俱備育三弟專心攻學皆得成立同堂仰以爲命者數十口人以爲難及爲文辭不事藻飾而暢達瞻敏優於需世而困於公車屈就蔭路終未得展其才而自在韋布厚蒙恩獎感激圖報殫誠盡職不以官卑而爲恥於靈沼亭一事可見矣志不克伸而年又不永豈非命耶權氏本安東大姓自麗朝世有勲德逮我朝栗亭樹節於莊陵石溪彰名於廢朝其後顯官聞人蔚然相望君之高祖曰禮曹叅判諱堦曾祖諱斗相僉知中樞府事贈吏曹叅議祖諱益文義禁府都事贈吏曹叅判考諱一衡兵曹

叅判以器局才猷名於世卽萬妙之再從兄而君之所後三四世也余旣銘叅判公又誌萬妙之壙故不復詳其世德妣貞夫人林川趙氏贈叅判明復女翰林諱正緯孫育一男繼大宗取萬妙公子子之萬妙諱萬衡進士有文行爲士友所重娶宗姓李氏匡明女寔生君君娶潘南朴氏長淳女有一男卽馥也年少舉進士有名是能繼其家聲者君之不食之報其在斯歟銘曰
器局足以需世貞固足以幹事屈驥足於一縣惜牛刀之未試靈閣肇成墨綬遽解天與才而不與命鬼

隨人而共擠良朋永歎兮親戚雪涕屋無棟兮車無輓斧斤兮莫上隴志士之所瘞

知訓鍊院事咸春君李公墓碣銘 并序

公諱昌運字聖俞李氏貫於咸平以高麗大將軍彥爲鼻祖入我朝有諱從生討平叛賊李施愛策勲封咸城君官漢城左尹贈兵曹判書生諱良北兵使其後冠纓連世至諱亨吉以蔭官平澤縣監卽公高祖也會祖諱相贈左承旨祖諱景奎贈吏曹叅判咸仁君以陰竹縣監諱樟次子嗣承旨公後本生祖諱景翼連山縣監卽陰竹公長子以孝行顯世贈執義旌

閩考諱壽龜實執義公長子繼咸仁君後承太宗少
有才畧負重名早卒官至都摠經歷用公貴贈兵曹
判書娶安東金氏府使重徽女以 肅廟癸巳十一
月十日生公幼而負氣好馳馬季父大諫公壽鳳巖
加訓飭每授書輒通曉無滯 英廟戊申當賊變安
撫使辟判書公爲佐赴湖南公時年十六擐甲仗劔
將馳往從之會判書公選籌司郎事得已公慨然奮
曰士當出爲世用何擇文武遂投筆畫赴射場夜歸
讀兵書甲寅丁父憂戊午以薦授宣傳官己未登武
科 上問曰黑面將軍咸城君於汝爲幾代祖奉祀

者誰也對曰是臣十一代祖而臣爲宗孫矣 上曰
汝異凡武宜習鞞畧特賜弓箭自是益感奮自勵期
爲國效力時 上親閱武傳命稱旨又賜弓箭以寵
之明年赴北邊防秋周覽山川關防閱屢月還陞六
品辛酉除武兼宣傳官遭內艱捲室下鄉壬戌荐遭
承重祖母喪公力耕稼節衣食以奉饋奠百口賴以
無飢鄉黨稱其幹局乙丑除訓練主簿兼司僕內乘
遷宣傳官丙寅移都摠經歷轉訓練副正兼備邊郎
丁卯爲祥原郡守剔民蠹簡兵籍實倉庾新廨宇五
載政成辛未移朔州府使治比於祥而邊務益修明

年入爲訓練正又明年拜安東營將陞通政甲戌以前任州郡勞擢嘉善階拜同知中樞襲封咸春君丙子拜宣川防禦使秩滿以治最賜璽書以獎之己卯拜慶尙水使南人聞公來邊門爲肅繡衣褒聞庚辰移濟州牧使濟絕海孤島也專制三邑王化逃遠軍政不均貧戶最困公巡過聚點民丁一見而默識之及其分簽悉充以富且健者一島驚服以爲神辛巳適還 上召問其山川謠俗貢獻土產公條對甚悉上稱之曰畫不如也時海西兵營有出錢歛息之法民不能堪朝廷罪其帥擇有威望才局者代之 上

特簡公至則削冗費輸餘俸以實庫而焚其券臚列以聞 上曰是能拔本塞源可謂不負委畀矣甲申拜南兵使翌年遞丙戌廟堂薦拜坡州牧使勅設防禦營整軍伍修器械仍大建官廨或疑其過制公曰有以也後 車駕過州經宿儀衛悉有所庇人始服其先事之識己丑除安東府使明年還拜副摠管時凶賊厚謙竊權張甚舉世趨伏有誘以交驩者公不應竟爲其暗嗾斥補會寧府使經歲始還仍枳廢者五六年人皆危之公曰富貴福禍莫非命也未幾謙敗甲午擢登俊試弟統制公明運亦與焉 上賜祭

一壇榮其親墓乙未以勲臣奉祀陞嘉義今 上丁酉薦授統制使公按簿閱儲嘆曰此何以控三道而備陰雨耶遂指畫壯關防蘇軍民之策馳驛以聞廟堂格不行遂出萬緡錢紓其急明年以病辭己亥特除右捕將兼訓營亞帥隨駕 寧陵方札駐信地有命退環衛十步時國榮爲大將初不傳布一軍無知者事覺送人謂曰如下詢須自服可無事公答曰但當以實敢謾辭耶脅喝三四終不撓及命拿入公直對以實 上竟不罪只遞其職或曰何執之固而忤彼甚耶公曰吾知不欺君而已不知他也庚子拜龍

虎大將兼左捕將辛丑薦拜平安兵使數月御營大將缺 上注意於公廟堂諉以年老沮遏甚力 上特擢焉受任甫半年隨事剗弊約已歸公者殆萬餘嘗扈 駕行幸領軍而殿到雨裝峴駐蹕命易前後廂峴峻且阨公令軍曰視余馬首後者師有律遂引轡揚鞭鼓行上下而部伍不亂 上顧謂侍臣曰馳突峻坂乃如是孰謂其老也衛士莫不動色旋拜漢城左尹兼訓練都正壬寅移拜摠戎使條覈倉糴以裕軍食是年拜左右捕將者四拜同義禁者一翌年又拜摠使疏陳營弊事竟不施乙巳以子儒敬貴進

階資憲拜知義禁都摠管丙午拜知中樞府事自是
拜摠使捕將金吾者無虛歲輒引病辭己酉拜知訓
鍊事庚戌加正憲階辛亥復拜摠使又辭適蓋以年
至不赴朝者累歲以是年六月二十日考終于第撤
朝祭賻如例九月四日葬于水原汾花川先隴西坐
岡配貞夫人宜寧南氏通德郎益輝女水使崙孫孝
順勤儉奉先御下俱有矩範生於庚寅歿於壬寅始
葬於先塋側移祔于公左舉二男長儒弘通政府使
先公卒次儒敬嘉善兵使儒弘無子以修撰儒慶子
益緒爲嗣一女適鄭順祚儒敬女歸安光贊不佞與

公同朝殆三十餘年屢與周旋於公班私席見公眉
宇雋爽器度軒昂秀出於輩行與之接語侃侃焉和
易詳整已知其中有所蘊屢試闡鉞戎垣盡心國事
綽有成績晚年知足謝病優遊身名不瑕可謂通才
而福將也且久在鄰社得詳公實行居家檢身尺度
簡嚴不失儒素之風奉先追遠出於至誠惇親急人
疎戚皆得其歡心未嘗不嘆賞今兵使君具公事行
來乞麗牲之辭義有不可辭者謹序次而爲之銘曰
國家偃武將無試能狃于貨勢跣蹈渠繩公以勲適
惟朝惟國身雖跗注心則縫掖外梱內壇器利庫羸

不懾不援 上簡爲榮暮境寬樂花欄藥圃風餘黑
面謠傳大樹有弟聯武有子趾美勒石徵後彼汾之
水

三道統禦使許公墓碣銘

并序

士大夫立朝檢身惟清德難持稽之史牒可歷數也
肆我朝立國最重廉節有清白吏之選而以武進者
絕罕焉當 英考御極有水軍節度使許公晶膺是
選當世榮之節度公有孫曰任克嗣其美人稱許氏
世有人矣公字仁叟生於 英廟丙午三歲而患痘
絕半日旣斂忽有聲從簣中出往視之甦矣人咸異

之九歲丁父憂持喪如成人旣闋節度公命就外傳
傳奇公文辭贈之以詩曰文章十歲已驚人其後連
遭承重祖考妣喪率禮無愆豐原趙相國顯命以節
度公清白請錄後甲戌膺南行宣傳官薦丙子登虎
榜明年以武兼宣傳官入侍 上問知爲節度孫諭
之曰毋忝爾祖因命實授以善射陞訓練院主簿判
官兼備邊司郎轉都摠府經歷叅上宣傳官訓練院
副正庚辰拜順川郡守辛巳通擬訓練院正卽武臣
極選也癸未陞爲西原討捕使轉慶興府使尋除靈
巖郡守未發公叔父兵使公卒官安邊公曰官可去

喪不可不迎遂白大臣解官迎歸庚寅由司僕寺內
乘出爲永宗鎮防禦使陞黃海水軍節度使以在外
遞又出牧驪州州多大族號難治公律已字民民歌
其清德比以驪江之水有御史按虛糴抵重律公條
對有據 上教曰乃祖之孫寧有是哉仍命編配翌
年而宥丙申出牧定州今 上新卽位教曰治定如
驪則可忘憂矣至州之明年大饑公曰吾寧得罪於
朝廷不忍視民死也加糶以濟之竟坐罷己亥江華
府陞統禦營 上特命公爲中軍三年而歸民鑄崖
而思之辛丑爲金海府使以親病適除行首宣傳官

上命畀近地以便養得長湍壬寅四月竟遭憂時公
年近六旬而執喪盡禮衰經不暫脫饋奠未嘗使人
代之一日因夕哭氣絕而仆大衄十數器自是成貞
疾制畢授羅州討捕使遂陞左水軍節度使因事罷
己酉敕爲內禁衛將是時新設長津府於北路伐木
通道募民開荒朝廷難其人屬之公單騎赴官措置
有方修繕儲待完聚民伍屹然爲巨防窮塞草創不
霑王化乃建學校捐廩課士民俗漸齒內地方伯上
最曰雅望有素武而文治辛亥晉秩陞會寧府使轉
南關節度使未久罷歸甲寅又出爲喬桐防禦使尋

通明年除禁衛中軍都摠府副摠管自是望秩俱隆
浸浸將嚮用矣素患血疾遂成腸癰竟以丙辰六月
十四日不起訃聞賜賻祭如儀以其年八月十八日
葬于廣州北巖寺洞坐未之原許氏遠自駕洛國中
世以孔巖村主佐麗祖破甄萱受封于陽川太學士
珙平章事伯俱以名節顯入本朝右議政琮以文武
全才爲國名相於公爲十世祖也又六七傳而至諱
博文科佐郎丙子扈 仁廟入南漢和成歸鄉廬子
諱導贈兵曹叅判其高曾祖也考諱聖以公貴贈兵
曹叅判宏文詞有質行妣貞夫人海州吳氏判書祥

後進士昶女也公生於將家而天姿甚高有儒素風
平居斂膝危坐動靜語默皆有規度襟懷坦蕩表裏
粹白人莫不敬服母夫人中嬰奇疾殆不識饑飽公
左右扶將先意承奉夫人享大耋忠養終始無憾君
子以爲難事叔父如父視諸從如同氣其莅官也愛
民如子尤謹於慮囚百姓稱之以許佛常訓子弟曰
早成不如晚就退讓終必有得從宦四十餘年清貫
顯仕非不歷踐而皆以久次序陞守靜簡出饋遺不
及朝貴平生不營財產屢典州閫而田土不增尺寸
家衆不免饑及歿身無斂衣人服其清操有自來也

耳溪集 卷二十九
配貞夫人李氏益安大君之後學生之昉女事姑一
視公公雖出而吳夫人安之如公在傍無丈夫子子
從弟侗之子濺武科前都事女長適前宣傳官李濟
遠次適武府使李煜不佞與公同朝雅聞公居官制
行謂可以風勵衰俗今都事之弟瀝賚公事行來乞
刻墓之辭余遂樂爲之敘系之以詩曰

謂之武耶布素其德謂之儒耶韎韋其服外名內實
君子之則維孝維讓維民之式逃彼長津三載開鑿
國有巨鎮氓變夷俗介然一節如水如蘂云誰之受
乃祖貞白我摘短詞鐫此牲石敢比良史斯無媿色

訓鍊院判官贈左承旨金公墓碣銘

并序

東方素多名將而其爲國干城世著勲節者先數安
東之金在高麗若上洛公方慶屢勦丹兵名振華夷
在本朝若遼東伯應河爲皇明力戰死深河其弟御
營大將應海當丙子難守正方城拒大敵世比顏平
原兄弟御將之子曰克鍊贈戶曹叅判孫曰世翊繼
登師垣爲摠戎使漢城左尹清儉自飭爲韎韋式娶
竹山李氏僉樞緝之女生公於 肅廟乙丑公諱重
一字思純幼而魁嶷異凡年十四五連遭父母喪克
遵禮制及長文翰敏優而自以將家子勉就武舉壬

辰薦授南行宣傳官壬寅登庭試以御營郎移拜訓
鍊院判官戊申逾變公適在西關疾馳赴難慷慨詣
朝堂陳方畧請從征在途宿疾作到全州遂歿卽四
月十三日也得年止四十四帥府爲之痛惜翌月返
葬於鐵原漁隱洞先塋下向西而封淑人延安李氏
主簿延挺之女舉一男三女男浣防禦使不幸無年
女歸柳鎮泰郡守成埜安宗翼防禦一男明遇今兵
使女適鄭會祚側出男恒遇武科公風儀秀美姿性
謙慎每以早失怙恃爲至痛凡於奉先之事殫盡誠
禮篤於親族婚喪憂病無不周卹一門大小事咸就

辦焉教子姪慈而嚴從子御將公年相隣偕長一室
而事之甚謹人皆服其家法及其出身一心報國思
繼家聲臨難奮身與疾赴陣天不假命中途奄忽豈
非命耶聖人有言曰志士不忘在溝壑勇士不忘喪
其元公志在敵愾身死師行其與執干戈尸原野何
異是可謂無忝厥祖矣銘曰
君子死綏壯士衽革非死於戰乃殉於國鐵山嶄巖
歸藏毅魄惟忠不磨墓門有石

永宗防禦使贈兵曹叅判金公墓碣銘

并序

公諱浣字子新金氏出於新羅敬順王自慶州徙安

東以高麗上洛公方慶爲鼻祖入本朝世有名德至
遼東伯應河爲皇明戰死於深河名動華夷有弟曰
應海當丙子亂守正方城提孤軍抗大敵爲時名將
卽公高祖也會祖諱克鍊贈戶曹叅判祖諱世翊摠
戎使漢城左尹考諱重一訓練院判官贈左承旨妣
延安李氏主簿延挺女以 肅宗甲午生公當戊申
逆亂承旨公自願從征歿於全州公年甫成童迎櫬
居堊葬祭以禮丙辰登庭試武科拜宣傳官己未陞
六品轉都摠都事訓練主簿判官僉正辛酉再入宣
傳官以副正出知陽德縣當辛壬大飢捐廩賑賑闔

境無瘠一路取以爲式時再從兄統制公歿於谷山
任所公將馳往哭請由於方伯而不許卽投狀徑發
竟及於鞠發之前蓋人人所難能也方伯大義之竟
置不問乙丑以訓練正內移陞爲大丘營將戢奸盜
除民害所部謚如丁卯除滿浦僉使地居塞衝戎備
疎畧公銳意修飭繕器械簡卒伍勸射藝明賞罰邊
門改觀明年入爲內禁將復出爲永宗防禦使己巳
某月日歿於官得年僅三十六葬于鐵原沙器里庚
坐之原配平山申氏同樞曠之女教子以方御家有
則宗黨稱其婦德與公同年生終於庚寅舉一男明

耳溪集 卷二十九
遇今官兵使馳贈公兵曹叅判夫人從贈貞夫人一
女適士人鄭會祚側室男恒遇武科兵使繼子魯益
恒遇之子魯學公生於將家早登名塗內外踐敷譽
望蔚然而壯年隕折官未遂而才不展嗚呼惜哉今
兵使君繼仗戎鉞克振家聲不食之報於是乎有徵
矣兵使將赴湖泉來辭余泣而請曰私門不幸兩世
無祿短年無以表見於世不肖早孤靡有記識只憑
長老傳記謹具系族官歷所幸一言之惠以饒墓石
庶幾禁樵牧而示後昆焉余悲其言而感其誠遂爲
之銘曰

人有恒言將門出將遼伯兄弟世莫與伉公奮其胄
箕裘韜畧黑頭邊禦有威有績跬步戎壇飛不盡翮
豹斑七日驥子八尺身闕報長有兒秉鉞公靈在山
松檟勿伐

昌城防禦使張公墓碣銘

并序

公姓張諱天用字汝龍上祖高麗太師貞弼廟食安
東其後遂以爲貫中世有花寧伯儷以禮儀判書貶
官義州仍家焉有子思吉聞我 太祖舉義旋師杖
策詣軍門贊成大業冊元功封花山府院君生知中
樞哲叅定社勲七世至厚健慷慨有膽畧當丙丁之

耳溪集 卷二十九
際與其舅崔孝一及車禮亮安克誠等謀內附皇朝
事覺與府尹黃一皓同遇害事在義士傳卽公會祖
也祖諱羽翼贈戶曹叅議考諱漢奎贈戶曹叅判妣
贈貞夫人慶州金氏僉使禹弼之女公以 肅宗癸
未生狀貌俊偉幼與羣兒戲聚沙爲城築壇坐其上
號令進退見者奇之旣長就學聰悟絕人已而歎曰
男兒生邊陲安用詩書遂投筆習騎射乙卯中庭試
隸西北廳以久勤當差邊將公辭曰不由內三廳而
出乘一障非吾志也時李相國宗城按本道啓設別
薦一窠以慰邊人公首被選丙寅授守門將直弘化

門 上幸蕩春臺是夕駕還前驅文武官促開門公
以無信符拒不納俄而符至門乃開明日 上適臨
殿召公入諭曰昨日事汝誠得體顧謂兵判洪象漢
曰此人能守職今觀其貌必有才局可擢用也尋超
六品除訓練主簿自是名入政日輒受點循序陞判
官僉正庚午出爲黃海兵虞侯八月丁父憂癸酉府
尹南泰耆聞公能使監築白馬外城役訖事聞賞加
折衝是秋丁母憂一日 上臨朝問曰張天用久不
見於政望何也兵判以居喪對命待吉官之丙子拜
五衛將在侍衛 上目之曰彼身長而面棗色者誰

耳溪集 卷二十九
承旨曰某也卽命之前敎政曹曰王政用人爲先張
天用以龍灣人有古武士儀表可內將尋除僉知中
樞事 上復見於班行謂侍臣曰卿等不肯用張天
用耶其名天用予當用之仍問爾字云何對曰汝龍
也兵判曰古詩云天用莫如龍故爾 上曰然善乎
其字之也遂移拜羽林將是冬除漆谷府使時值大
荒公殫誠調救哺饑充逋推餘力修城隍繕兵甲理
軍籍蠲僧役百度俱舉僧與民俱伐石頌之御史褒
聞 上嘉之命調右職及瓜民齊訴籌司請留遂加
任半年庚辰 上又下敎曰張天用治能著聞豈使

一府使止耶可用爲邊帥仍授內禁將轉司僕將居
無何除昌城府使兼防禦使嚴邊禁戢奸猾邑大治
境凡五倉九坊皆有惠政碑公聲績益茂踐歷已優
方有制閫之望乃喟然嘆曰疎遠之人官至防禦斯
足矣遂謝官歸鄉二十年不一跡京師間有內將之
命亦不赴然感激國恩每當春秋名節具冠帶東向
四拜癸巳年滿七十陞嘉善大夫同知中樞府事乙
巳十月二十三日終于家壽八十有三漆谷之民間
公喪裹足數千里來哭昌城父老爭持牲醴致奠焉
配貞夫人慶州崔氏命休之女先公歿葬于義州古

城村負巽之原以公合封焉有二男長濟鵬繼伯父
後濟鵬折衝巡將一女適朴大廈側室男濟維濟純
濟鵬四女歸白光倫白基鳳白以哲白仁謙濟鵬男
胤祚女歸安沃朴二男女婿車信用文科公爲人倜
儻居官守法不以小惠悅民從宦在京未嘗見政官
故 上眷雖隆而時無汲引者遂未得大用然終不
以介意膂力未愆退而終老可謂高於人矣家居好
讀書善事親周恤宗族訓飭子弟鰥處三十年蕭然
如僧室人服其操守余於癸未秋爲灣尹致書禮之
公來謝豐幹赭面鬚髯如戟與之語傑然有奇氣真

兔置干城之材也惜乎其垂老沉屈未幾余解歸後
二十年壬寅奉使如燕公尙無恙老病不能來遣子
濟鵬勞遠行余爲之一喜一悵粵四年公乃歿其外
從孫鄭趾顯持家狀來乞樹墓之辭遂敘次而銘之

銘曰

飛鶴之下鴨水西奔花山鍾英義士有孫遇知 明
主非藉媒援矚面衆中儀狀魁軒牧民禦邊輿口誦
喧胡不旄鉞壯我塞垣飄然疋驢歸臥田園皤皤其
髮恂恂其言時節東望遙拜國恩傳家忠謹以式後
昆

安佐郎墓碣銘

并序

龍灣國之西塞距京師千里隔水對遼瀋士皆業馳射擊刺否則包銀走燕市射利而已本朝以文教化封內沮薩以西往往有治功令取科第者惟灣最遠寥寥無聞至三百餘年始得安公鳴鶴安公字慎道幼而穎發鄉里稱奇童年十一止山沈相國爲府尹樗村先生時在子舍聞安氏子才召見奇之授以經史輒通曉無滯及相國解歸公卽辭父母隨去居五六年文藝大進以辭賦鳴國庠洛中才子爭與之交年二十九中道科第四名歷官成均學諭典籍禮曹

佐郎文兼宣傳官出爲青巖延曙祥雲察訪孟山康津縣監年四十九卒于康津任所嗚呼短矣良浩沈相國外孫也幼少時見公於樗村門下公眉宇秀朗舉止詳雅已知其爲端士也爲文辭筆翰如飛翩翩有生氣持身一槩以小學每侍先生執杖屢左右不離先生未就床不敢退鷄鳴卽冠帶詣寢側危坐默誦所授書達曙屢閱月不懈先生稱其篤學與子弟門生周旋恭抑自下雖僕隸之微待之有禮人無貴賤皆以是重公其爲典籍也澹雲曹公命教長國子課試輒引公對讀當世公卿競推詡將破例用之故

五溪集 卷二十九
釋褐十餘年未嘗一年閒屢試於外尤有能聲及其
歿也士大夫識與不識皆爲惜其才焉余於癸未承
乏守灣首訪公家公無子取弟鳴鳳子光勳爲後妻
趙氏尙無恙余爲致米肉召見光勳因鄉父老益詳
公本末公居家篤於孝友厚於宗黨一鄉莫不敬服
以四書章句訓後生西人始聞儒者之學矣後二十
年余以行人如燕再到灣光勳亦已死子其弟再勳
子鼎得余又召見爲之感焉愴懷又三年乙巳龍灣
尹尹侍郎師國馳書告余曰安慎道關西之傑也不
佞穉年嘗隨先君到灣從而問字今守是州見其後

嗣零弱名行湮滅甚可傷也其從父姪聖喆慨然伐
石具幣擬乞銘於搢紳大人環視斯世惟子識安公
可屬仍列其鄉系官歷生卒來余旣素重公又感尹
公能行古人之義而嘉聖喆之誠受而不辭噫公起
寒逃劬學立身名聞當世爲遠人倡是可銘也安氏
本嶺南順興人文成公裕爲東方宗儒後世稱望族
逮我朝有義城縣令應昌謫朔州子孫遂爲西關人
轉入邊郡從事弓馬至龍驤司直天富隸軍門死於
丁卯之難卽公高祖也曾祖曰僉知中樞儉南祖曰
同知中樞斯立父曰通德郎重德母金氏厚善之女

妻趙氏鼎寔之女庶子孝勲亦夭無後庶女從同知
金重喆夫死既葬自具棺衾不食而死鄉里稱其烈
公生於庚辰正月三十日歿於戊辰四月十六日葬
于府南月江山銘曰

美璞出於西崑明珠產於東海翠羽丹砂生於南桂
鴨水東出西薄遼薊公奮其趾亦足瑞世豈直伊才
聲教攸暨匪德曷模匪導孰啓我銘不泐以勸遐裔



